

歷朝

種五十三部

大觀

古今說海

明雲間陸氏原編

集成圖書公司印行

卯集

說淵第一編



上海图书馆藏书




A541 212 0017 0125B

明
雲
間
陸
氏
原
編

說
淵

集
成
圖
書
公
司
印



~~1553498~~

宣統元年夏卯冬

庚子年寅師

古今說海

說淵目錄

● 甲集三卷

靈應傳

洛神傳

夢遊錄

乙集七卷

吳保安傳

崑崙奴傳

鄭德璘傳

李章武傳

章自東傳

趙合傳

杜子春傳

丙集六卷

裴仙先別傳

震澤龍女傳

袁氏傳

少室先姝傳

李林甫外傳

遼陽海神傳

丁集六卷

毗蜉傳

甘棠靈會錄

顏濬傳

張無頗傳

板橋記

鄴侯外傳

戊集六卷

洛京獵記

玉壺記

姚生傳

唐暉手記

獨孤穆傳

王恭伯傳

己集七卷

中山狼傳

崔煒傳

陸顥傳

潤玉傳

李衛公別傳

齊推女傳

魚服記

庚集八卷

聶隱娘傳

袁天綱外傳

曾季衡傳

蔣子文傳

張遵言傳

侯元傳

同昌公主外傳

睦仁禱傳

辛集八卷

韋鮑二生傳

張令傳

李清傳

薛昭傳

王賈傳

烏將軍記

寶玉傳

柳參軍傳

壬集八卷

人虎傳

馬自然傳

寶應錄

白蛇記

巴西侯傳

柳歸舜傳

求心錄

知命錄

癸集五卷

山莊夜怪錄

五真記

小金傳

林靈素傳

海陵三仙傳

已上別傳家總六十四卷

目錄終



古今說海

靈應傳

說淵一 別傳一

涇州之東二十里有故薛舉城城之隅有善女湫廣袤數里蒹葭叢翠古木蕭疎其水湛然而碧莫有測其淺深者水族靈怪往往見焉鄉人立祠於旁曰九娘子神歲之水旱禳禳皆得祈請焉又州之西二百餘里朝那鎮之北有湫神因地而名曰朝那神其勝蠻靈應則居善女之右唐乾符五年節度使周寶在鎮日自仲夏之初數數有雲氣如奇峯者如美女者如鼠如虎者由二湫而興至於叢激迅風震雷電發屋拔樹數刻而止傷人害稼其數甚多寶責躬勵已謂爲政之未效致陰靈之所譴也至六月五日日午視事之暇昏然思寐乃解巾就枕寐猶未熟見一武士冠蓋被鎧持鉞而立於堦下曰有女客在門欲申叅謁故先聽命寶曰爾爲誰乎曰某卽君之闈者効役有年矣寶將詰其由已見二青衣厯階而升長跪於前曰九娘子自郊墅特來告謁故先使下執事致命於明公寶曰九娘子非吾通家親戚安敢造次相面乎言猶未終而見祥雲細雨異香襲人俄有一婦人年可十七八衣裙素澹容質

窈窕憑空而下立庭廡之間容儀綽約有絕世之貌侍者十餘輩皆服飾鮮潔有如妃主之儀顧步徊翔漸及堦所寶將少避之以俟其意侍者趨而言曰貴主以君之節義可申誠信可託故將寃抑之狀上訴明公公公忍不救其急難寶遂命升堦相見賓主之禮頗甚肅恭登席而坐祥煙四合紫氣充庭歛態低鬟若有憂戚之貌寶命酌醴設饌厚禮以待之俄而歛袂離席逡巡而言曰幸以寓止郊園綿歷多祀醉酒飽德蒙惠誠深雖以孤枕寒床甘心沒齒梵嫠有託負荷逾多但以顯晦殊途行止乖互今乃迫於情禮豈暇緘藏儻鑒幽情當敢披露寶曰願聞其說兼冀識其宗系苟可展分安敢以幽顯爲辭君子殺身以成仁狗其毅烈蹈赴湯火勞雪不平乃寶之志也對曰妾家世會稽之鄞縣卜築於東海之潭桑榆墳隴百有餘代其後遭世不造瞰室貽災五百人皆遭庾氏焚炙之禍纂紹幾絕不忍戴天潛遁幽岩庾寃莫雪至梁天鑿中武帝好奇召人通龍宮入枯桑島以燒燕奇味結好於洞庭君寶藏主第七女以求異寶尋聞家讐庾毗羅自鄞縣白水郎棄官解印欲承命請行陰懷不道因使得入龍宮假以求貨覆吾宗嗣賴杰公敏鑒知渠挾私請行欲賜無辜

之害慮其反貽伊戚辱君之命言於武帝武帝遂止乃命合浦郡落黎縣歐越羅子春代行妾之先宗羞其共戴慮其後患乃率其族韜光滅跡易姓變名避仇於新平眞甯縣安村披榛鑿穴築室於茲先人弊廬殆成胡越今三世卜居先爲靈應君尋受封應聖侯後以陰靈普濟功德及民又封普濟王威德臨人爲世所重妾卽王之第九女也笄年配於象郡石龍之少子良人以世襲猛烈血氣方剛憲法不拘嚴父不禁殘虐視事禮教蔑聞未及暮年果貽天譴覆宗絕嗣削跡除名唯妾一身僅以獲免父母抑遣再行妾終違命王侯致聘接軫交轅誠願旣堅遂欲拔刀自剄父母斥其剛烈遂遣屏居於茲土之別邑音問不通於今三紀雖慈顏未復溫清久違離羣索居甚爲得志近年爲朝那小龍以季弟未婚潛行禮聘甘言厚幣峻阻復來滅姓毀形殆將不可朝那遂通好於家君欲成其事遂使其季弟權徙居於王畿之西將質於我王以成姻好家君知妾之不可奪情乃令朝那縱兵相逼妾亦率其家僮五千餘人付以兵仗逆戰郊原衆寡不敵三戰三北師徒倦弊掎角無怙將欲收拾餘燼背城借一而慮晉陽水急臺城火炎一旦攻下爲頑童所辱縱沒於泉下無面

石氏之子故詩云汎彼栢舟在彼中河髮彼兩髦實維我儀之死矢靡他母也天只不諒人只此衛世子嬭婦自誓之詞又云誰謂鼠無牙何以穿我墉誰謂女無家何以速我訟雖速我訟亦不女從此召伯聽訟衰亂之俗微貞信之教興強暴之男不能侵凌貞女也今則公之教可以精通顯晦貽範古今貞信之教固不爲姬爽之下者幸以君之餘力少假兵鋒挫彼兇狂存其鰥寡成賤妾終天之誓彰明公赴難之心輒傾至誠幸無見阻寶心雖許之訝其辨博欲拒以他事以觀其詞乃曰邊徼事繫煙塵在望朝廷以西郵陷虜蕪沒者三十餘州將議舉戈復其土壤曉夕恭命不敢自安匪夕伊朝前茅卽舉空多憤悱未暇承命對曰昔者楚昭王以方城爲城漢水爲池盡有荆蠻之地藉父兄之資強國外連三良內助而吳兵一舉烏迸雲奔不暇嬰城迫於奔走寶玉遷徙宗社陵夷萬乘之靈不能庇先王之朽骨使申胥乞師於羸氏血淚汚於秦庭七日長號晝夜靡息秦伯憫其窘急竟爲出師復楚退吳僅存亡國况芊氏爲春秋之強國申胥乃衰楚之大夫而以矢盡兵窮委身折節肝腦塗地感動於強秦矧妾一女子父母斥其孤貞狂童凌其寡弱綴旒之急安得不少

動仁人之心乎寶曰九娘子靈宗異派呼吸風雲蠢爾黎元固在掌握又焉得示弱於世俗之人而自困如是者哉對曰妾家族望海內咸知只如彭蠡洞庭皆外祖也陵水羅水皆中表也內外昆季百有餘人散居吳越之間各分地土咸京入水半是宗親若以遣一介之使飛咫尺之書告彭蠡洞庭召陵水羅水率維陽之輕銳徵入水之鷹揚然後檄馮夷說巨靈鼓子胥之波濤混陽侯之鬼怪鞭驅列缺指揮豐隆扇疾風翻暴浪百道俱進六師鼓行一戰而成功則朝那一鱗立爲齋粉涇城千里坐變污瀦言下可觀安敢謬矣頃者涇陽君與洞庭外祖世爲姻戚後以琴瑟不調棄擲少婦遭錢塘之一怒傷生害稼懷山襄陵涇水窮鱗尋斃外祖之牙齒今涇上車輪馬跡猶在史傳具存固非謬也妾又以夫族得罪於天未蒙上帝昭雪所以銷聲避影而自困如是君若不悉誠款終以多事爲辭則向者之言不敢避上帝之責也寶遂許諾卒爵撤饌再拜而去寶及晡方寤耳聞目覽恍然如在翌日遂遣兵士一千五百人戍於湫廟之側是月七日鷄初鳴寶將晨興疎牖尙暗忽於帳前有一人經行於帷幌之間有若侍巾櫛者呼之命燭竟無酬對遂勵聲而叱之乃言曰幽

明有隔幸不以燈燭見迫也寶潛知其異乃屏氣息音徐謂之曰得非九娘子乎對曰某卽九娘子之執事者也昨日蒙君假以師徒救其危患但以幽顯事別不能驅策苟能存其始卒幸再思之俄而紗窻漸白注目視之悄無所見寶良久思之方達其義遂呼按吏命兵籍選亡沒者名得馬軍五百人步卒一千五百人數內選擇衙孟遠充行營都虞侯牒送善女湫神是月十一日抽廻成廟之卒見於廳事之前轉旋之際有一甲士仆地口動目瞬間無所應亦不似暴卒者遂置於廊廡之間及明方悟遂使人詰之對曰其初見一人衣青袍自東而來相見甚有禮謂某曰貴主蒙相公垂莫大之恩拯其焚溺然亦未盡誠款假爾明敏再通幽情幸無辭免也某急以他詞拒之遂以袂相牽慳然顛仆但覺與青衣者繼踵偕行俄至其廟促呼連步至於帷薄之前見貴主謂某云昨蒙相公憫念孤危俾爾戍於弊邑往返途路得無勞止余近蒙相公再借兵師深愜誠願觀其士馬精強衣甲銛利然都虞侯孟遠才輕位下甚無機略今月九日有遊軍三千餘騎掠我近郊遂令孟遠領新到將士要擊於平原之上設伏不密反爲彼軍所敗甚思一權謀之將俾爾速歸達我情素言

訖拜辭而出昏然如醉餘無所知矣寶驗其說與夢相符意欲質其前事遂差制勝
關使鄭承符以代孟遠是月十三日晚衙於後毬場瀝酒焚香牒請九娘神收管至
十六日制勝關申云今月十三日夜三更已來關使暴卒寶驚歎急使人馳傳着之
至則果卒唾心背不冷暑月停屍亦不敗壞其家甚異之忽一夜陰風慘冽吹砂走
石發屋拔樹禾苗盡偃及曉而止雲霧四布連夕不解至暝有迅雷一聲劃如天裂
承符忽呻吟數息其家剖棺視之良久復蘇是夕親隣咸聚悲喜相仍信宿如故家
人詰其由乃曰余初見一人衣紫綬乘驪駒從者十餘人至門下馬命吾相見揖讓
周旋手捧一牒授吾云貴主得吹塵之夢知君負命世之才欲遵南陽故事思殄邦
讐使下臣持茲禮幣聊展敬於君子而冀再康國步幸不以三顧爲勞也余不暇他
辭唯稱不敢酬酢之際已見聘幣羅於階下鞍馬噐甲錦綵服翫囊韉之屬咸布列
於庭吾辭不獲免遂再拜受之卽相促登車所乘馬異常駿快飾裝鮮潔僕御整肅
條忽行百餘里有甲馬三百騎已來迎候驅殿有大將軍之行李余亦頗得志指顧
之間望見一城雉堞穹崇溝洫深濬余愴恍不知所自俄於郊外備帳樂設享燕罷

入城觀者如堵傳呼小使交錯其間所經之門不記重數及至一處有如公署左右使余下馬易衣趨見貴主使人傳命請以賓主之禮見余自謂既受公文噐甲臨戎之具卽是臣也遂堅辭具戎服入見貴主使人復命請去囊韃賓主之間降殺可也余遂捨噐仗而趨入見貴主坐於廳上余拜一如君臣之禮拜訖連呼登堦余亦再拜升自西堦見紅粧翠眉蟠龍髻鳳而侍立者二十餘輩彈弦握管穠花異服而執役者又數十輩腰金拖紫曳組攢簪而趨隅者又非止一人也輕裘大帶白玉橫腰而森羅於堦下者其數甚多次命召女客五六人各有侍者十數輩差肩接跡累累而進余亦低視長揖不敢施拜坐定有大校數人皆令與坐舉酒進樂酒至貴主斂袂舉觴將欲興詞敍向來徵聘之意俄聞烽燧四起叫噪喧呼云朝那賊部步騎數萬人今日平明攻破堡寨尋已入界數道齊進煙火不絕請發兵救應侍坐者相顧失色諸女不及敍別狼狽而散余及諸校降堦拜謝佇立聽命貴主臨軒謂余曰吾受相公非常之惠憫以孤惇繼發師徒拯其患難然以車甲不利權略是思今不羞弊陋所以命將軍者正爲此危急也幸不以幽僻爲辭少匡不迨遂別賜戰馬

二匹黃金甲一副旌旗鉞珍寶器用充庭溢目不可勝計彩女二人給以兵符錫賚甚豐余拜捧而出傳呼諸將指揮部伍內外響應是夜出城相次探報皆云賊勢漸雄余素諳其山川地里形勢孤虛遂引軍夜出去城百餘里分布要害明懸賞罰號令三軍設三伏以待之遲明排布已畢賊汰其前功頗甚輕進猶謂孟遠之統衆也余自引輕騎登高視之見煙塵四合行陣整肅余先使輕兵搦戰示弱以誘之接以短兵且行且戰金革之聲天裂地坼余引兵詐北彼亦盡銳前趨鼓噪一聲伏兵盡起十里轉戰四面夾攻彼軍敗績死者如麻再戰再奔朝那狡童漏刃而去從亡之卒不過十人余選生馬二十騎追之果生置於麾下由是血肉漬草木脂膏潤原野腥穢蕩空戈甲山積賊帥以輕車馳送於貴主貴主登平朔樓受之舉國士民咸來會集引於樓前以禮責問唯稱死罪竟絕他詞遂令押赴都市腰斬臨刑有一使乘傳來自王所持急詔令促赦朝那曰朝那之罪吾之罪也汝可赦之以輕吾過貴主以父母再通音問喜不自勝顧謂諸將曰朝那妄動卽父之命也今使赦之亦父之命也昔吾違命乃貞節也今若又違是不祥也遂命解縛使單騎送歸未及朝那

包羞而卒於路余以克敵之功大被寵賜尋備禮拜平難大將軍食朔方一萬三千戶別賜第宅輿馬寶器衣服婢僕園林邸第麾幢鎧甲次及諸將賞賚有差明日大宴預坐者不過五六人前所見六七女皆來侍坐手姿豔態愈更動人笑語竟夕酣飲甚歡酒至貴主觴而言曰妾之不幸少處空閨天賦孤貞不從嚴父之命屏居於此三紀矣蓬首灰心未得其死鄰童迫脅幾至顛危若非相公之殊惠將軍之雄武則息國不言之婦又爲朝那之囚耳永言斯惠終天不忘遂以七寶鐘酌酒使人持送鄭將軍吾因避席再拜而飲余自是頗動歸心詞理懇切遂許給假一月宴罷明日辭謝訖擁其麾下三十餘人返於來路所經之處聞雞犬頗甚酸辛俄頃到家見家人聚哭靈帳儼然麾下一人令余促入棺縫之中余擬前而爲左右所聳俄聞震雷一聲醒然而悟承符自此不事家產唯以後事付妻孥果經一月無疾而終其初欲暴卒每告其所親曰余本機鈴入用効節戎行雖奇功蔑聞而薄効竊立洎遭釁累譴謫於茲平生志氣鬱然未申丈夫終當扇長風摧巨浪推泰山以壓卵決東海以沃瑩奮其鷹犬之心爲人雪不平之事吾朝夕當有所受與子分襟固不久矣其

月十三日有人自薛舉城晨發十餘里天初平曉忽見前有車塵競起旌旗煥赫甲馬數百人中擁一人氣槩洋洋然逼而視之鄭承符也此人驚訝移時因伫於路左見譬如風雲抵善女湫而去俄無所見

靈應傳終



古今說海

洛神傳

說淵二別傳二

太和中處士蕭曠自洛東遊至孝義館夜憩於雙美亭時月朗風清曠善琴遂取琴彈之夜半調甚苦俄聞洛水之上有長歎者漸相逼乃一美人曠因捨琴而揖之曰彼何人斯女曰洛浦神女也昔陳思王有賦子不憶也耶曠曰然曠又問曰或聞洛神卽甄皇后謝世陳思王遇其魄於洛濱遂爲感甄賦後覺事之不正改爲洛神賦寄意於宓妃有之乎女曰妾卽甄后也爲慕陳思王之才調文帝怒而幽死後精魄遇王於洛水之上敍其冤抑因感而賦之覺事之不典易其題乃不謬矣俄有雙鬟持茵席具酒殺而至謂曠曰妾爲袁家新婦時性好鼓琴每彈至悲風及三峽流泉未嘗不盡夕而止適聞君琴韻清雅願一聽之曠乃彈別鶴操及悲風神女長歎曰眞蔡郎中之儔也問曠曰陳思王洛神賦如何曠曰眞體物溜亮爲梁昭明之精選爾女微笑曰狀妾之舉止云翮若鶩鴻婉若遊龍得無疎矣曠曰陳思王之精魄今何在女曰見爲遮須國王曠曰何爲遮須國女曰劉聰子死而復生語其父曰有

人告某云遮須國久無主待汝父來作主卽此國是也俄有一青衣引一女曰織綃娘子至矣神女曰洛浦龍君之愛女善織綃於水府適令召之爾曠因語織綃曰近日人世或傳柳毅靈姻之事有之乎女曰十得其四五爾餘皆飾詞不可惑也曠曰或聞龍畏鐵有之乎女曰龍之神化雖鐵石金玉盡可透達何獨畏鐵乎畏者蛟螭輩也曠又曰雷氏子佩豐城劍至延平津躍入水化爲龍有之乎女曰妄也龍木類劍乃金金旣尅木而不相生焉能變化豈同雀入水爲蛤雉入水爲蜃哉但寶劍靈物金水相生而入水雷生自不能沈於泉耳其後搜劍不獲乃妄言爲龍且雷煥只言化去張司空但言終合俱不說爲龍任劍之靈異亦人之鼓鑄鍛鍊非自然之物是知終不能爲龍明矣曠又曰梭化爲龍如何女曰梭木也龍本屬木變化歸本又何怪也曠又曰龍之變化如神又何病而求馬師皇療之女曰師皇是上界高眞哀馬之引重負遠故爲馬醫愈其疾者萬有餘匹上天降鑒化其疾於龍唇吻間欲驗師皇之能龍後負而登天假之非龍真有病也曠又曰龍之嗜燕血有之乎女曰龍之清虛貪飲沆瀣若食燕血豈能行藏蓋嗜者乃蛟蜃輩耳無信造作皆梁朝四

公誕妄之詞爾曠又曰龍何好曰好睡大卽千年小不下數百歲偃仰於洞穴鱗甲間聚積沙塵或有鳥銜木實遺棄其上乃甲拆生樹至於合抱龍方覺悟遂振迅修行脫其體而入虛無澄其神而歸寂滅自然形之與氣隨其化用散入真空若未胚腓若未凝結如物在恍忽精奇杳冥當此之時雖百骸五體盡可入於芥子之內隨其舉止無所不之自得還元返本之術與造化爭功矣曠又曰龍之修行向何門而得女曰高眞所修之術何異上士修之形神俱達中士修之神超而形沉下士修之形神俱墜且當修之時氣爽而神凝有物出焉卽老子云恍恍忽忽其中有物也其於幽微不敢泄露恐爲上天譴謫爾神女遂命左右傳觴敘語情況昵洽蘭豔動人若左瓊枝而右玉樹繾綣永夕感暢其懷曠曰遇二仙娥於此眞所謂雙美亭也忽聞鷄鳴神女乃留詩曰玉筋凝腮憶魏宮朱絲一弄洗清風明晨追賞應愁寂沙渚煙銷翠羽空織綃詩曰織綃泉底少歡娛更勸蕭郎盡此壺悲見玉琴彈別鶴又將清淚滴眞珠曠答二女詩曰紅蘭吐豔開天桃自喜尋芳數已遭珠珮鵲橋從此斷遙天空恨碧雲高神女遂出明珠翠羽二物贈曠曰此乃陳思王賦云或採明珠或

拾翠羽故有斯贈以成洛神賦之詠也龍女出輕絹一匹贈曠曰若有胡人購之非
萬金不可神女曰君有奇骨異相當出世但澹味薄俗清襟養真妾當爲陰助言訖
超然躡虛而去無所睹矣後曠保其珠絹多遊嵩岳友人嘗遇之備寫其事今遁世
不復見焉

洛神傳終

古今說海

夢遊錄

說淵三別傳三

櫻桃青衣

獨孤遐叔

邢鳳

沈亞之

張生

劉道濟

櫻桃青衣

天寶初有范陽盧子在都應舉頻年不第漸窘迫嘗暮乘驢遊行見一精舍中有僧開講聽徒甚衆盧子方詣講筵倦寢夢至精舍門見一青衣攜一籃櫻桃在下坐盧子訪其誰家因與青衣同餐櫻桃青衣云娘子姓盧嫁崔家今孀居在城因訪近屬卽盧子再從姑也青衣曰豈有阿姑同在一都郎子不往起居盧子便隨之過天津橋入水南一坊有一宅門甚高大盧子立於門下青衣先入少頃有四人出門與盧子相見皆姑之子也一任戶部郎中一前任鄭州司馬一任河南功曹一任太常博士二人衣緋二人著綠形貌甚美相見言敘頗極歡暢斯須引入北堂拜姑姑衣紫衣年可六十許言詞高朗威嚴甚肅盧子畏懼莫敢仰視令坐悉訪內外備諳氏族

遂訪兒婚姻未盧子曰未姑曰吾有一外甥女姓鄭早孤遺吾妹鞠養甚有容質頗有令淑當爲兒平章計必允遂盧子遽卽拜謝乃遣迎鄭氏妹有頃一家並到車馬甚盛遂檢歷擇日云後日大吉因與盧子定謝姑云聘財函信禮物兒並莫憂吾悉與處置兒在城有何親故並抄名姓并具家第凡三十餘家並在臺省及府縣官明日下函其夕成結事事華盛殆非人間明日拜席大會都城親表拜席畢遂入一院院中屏帷牀席皆極珍異其妻年可十四五容色美麗宛若神仙盧生心不勝喜遂忘家屬俄又及秋賦之時姑曰禮部侍郎與姑有親必合極力更勿憂也明春遂擢第又應宏詞姑曰吏部侍郎與兒子弟當家連官情分偏洽令渠爲兒必取高第及榜出又登甲科授秘書郎姑云河南尹是姑堂外甥令渠奏畿縣尉數月勅授王屋尉遷監察轉殿中拜吏部員外郎判南曹銓畢除郎中餘如故知制誥數月卽眞遷禮部侍郎兩載知舉賞鑒平允朝廷稱之改河南尹旋屬車駕還京遷兵部侍郎扈從到京除京兆尹改吏部侍郎三年掌銓甚有美譽遂拜黃門侍郎平章事恩渥綢繆賞賜甚厚作相五年因直諫忤旨改左僕射罷知政事數月爲東都留守河南尹

兼御史大夫自婚媾後至是經三十年有七男三女婚宦俱畢內外諸孫十人後因出行卻到昔年逢攜櫻桃青衣精舍門復見其中有講遂下馬禮謁以故相之尊處端撥居守之重前後導從頗極貴盛高自簡貴輝映左右升殿禮佛忽然昏醉良久不起耳中聞講僧唱云檀越何久不起忽然夢覺乃見著白衫服飾如故前後官吏一人亦無傍徨迷惑徐徐出門乃見小豎捉驢執帽在門外立謂盧曰人饑驢饑耶君何久不出盧訪其時奴曰日向午矣盧子罔然歎曰人世榮華窮達富貴貧賤亦當然也而今而後不更求官達矣遂尋仙訪道絕蹟人世焉

獨孤遐叔

貞元中進士獨孤遐叔家於長安崇賢里新娶白氏女家貧下第將遊劍南與其妻訣曰遲可周歲歸矣遐叔至蜀羈棲不偶逾二年乃歸至鄠縣西去城尙百里歸心迫速取是夕到家趨斜徑疾行人畜既殆至金光門五六里天色已暝絕無逆旅唯路隅有佛堂遐叔止焉時近清明月色如晝繫驢於庭外入空堂中有桃杏十餘株夜深施衾幃於西窗下偃臥方思明晨到家因吟舊詩曰近家心轉切不敢問來人

至夜分不寐忽聞牆外有十餘人相呼聲若里胥田叟將有供待迎接須臾有夫役數人各持畚鍤箕箒於庭中糞除訖復去有頃又持床席牙盤蠟炬之類及酒具樂器闐咽而至遐叔意謂貴族賞會深慮爲其迫逐乃潛伏屏氣於佛堂梁上伺之鋪陳既畢復有公子女郎共十數輩青衣黃頭亦十數人步月徐來言笑晏晏遂於筵中間坐獻酬縱橫履舄交錯中有一女郎憂傷摧悴側身下坐風韻若似遐叔之妻窺之大驚卽下屋椽稍於暗處迫而察焉乃真是妻也方見一少年舉杯屬之曰一人向隅滿坐不樂小人竊不自量願聞金玉之聲其妻冤抑悲愁若無所控訴而強置於坐也遂舉金雀收泣而歌曰今夕何夕存耶沒耶良人去兮天之涯園樹傷心兮三見花滿座傾聽諸女郎轉面揮涕一人曰良人非遠何天涯之謂乎少年相顧大笑遐叔驚憤久之計無所出乃就階間捫一大磚向坐飛擊磚纔至地悄然一無所有遐叔悵然悲惋謂其妻死矣速駕而歸前望其家步步悽咽比平明至其所居使蒼頭先入家人並無恙遐叔乃驚愕疾走入門青衣報娘子夢魘方悟遐叔至寢妻臥猶未興良久乃日向夢與姑妹之黨相與翫月出金光門外向一野寺忽爲兇

暴者數十脅與雜坐飲酒又說夢中聚會言語與遐叔所見並同又云方飲次忽見大磚飛墮因遂驚魘殆絕纔寤而君至豈幽憤之所感耶

邢鳳

元和十年沈亞之始以記室從事隴西公軍涇州而長安中賢士皆來客之五月十八日隴西公與客期宴於東池便館既半隴西公曰余少從邢鳳遊記得其異請言之客曰願聽公曰鳳帥家子無他能後寓居長安平康里南以錢百萬質故豪洞門曲房之第卽其寢而晝偃夢一美人自西楹來環步從容執卷且吟爲古妝而高鬢長眉衣方領繡帶被廣袖之襦鳳大悅曰麗者何自而臨我哉美人曰此妾家也妾好詩而常綴此鳳曰幸少留得觀覽於是美人授詩坐西床鳳發卷視其首篇題之曰春陽曲曲終四句其後他篇皆類此凡數十篇美人曰君必欲傳無令過一篇鳳卽起從東廡下几上取彩箋傳春陽曲其詞曰長安少女翫春陽何處春陽不斷腸舞袖弓彎渾忘卻羅帷空度九秋霜鳳卒吟請曰何謂弓彎曰妾昔年父母使教妾此舞美人乃起整衣張袖舞數拍爲弓彎狀以示鳳旣罷美人低然良久卽辭去鳳

曰願復少留須臾間竟去鳳亦尋覺昏然無有所記及更於襟袖得其辭驚視復省所夢事在貞元中後鳳爲余言如是是日監軍使與賓府羣佐及宴隴西獨孤鉉范陽盧簡辭常山張又新武功蘇滌皆歎息曰可記故亞之退而著錄明日客復有至者渤海高元中京兆韋諒晉昌唐炎廣漢李囑吳興姚合洎亞之復與集於明玉泉因出所著以示之於是姚合曰吾友王生者元和初夕夢遊吳侍吳王久之聞宮中出輦吹簫擊鼓言葬西施王悲悼不止立詔門客作挽歌詞生應教爲詞曰西望吳王闕雲書鳳字牌連江起珠帳擇土葬金釵鋪地紅心草三層碧玉階春風無處所悽恨不勝懷詞進王甚佳之及寤能記其事王生本太原人也

沈亞之

太和初沈亞之將之邠出長安城客索泉邸舍春時晝夢入秦主內史廖家內史廖舉亞之秦公召至殿前促前席曰寡人欲強國願知其方先生何以教寡人亞之以齊桓對公悅遂試補中涓秦官名使佐西乞術伐河西晉秦郊也亞之帥將卒前攻下五城還報公大悅起勞曰大夫良苦休矣居久之公幼女弄玉壻蕭史先死公謂亞之

曰微大夫晉五城非寡人有甚德大夫寡人有愛女而欲與大夫備灑掃可乎亞之少自立雅不欲遇幸臣蓄之固辭不得請拜左庶長尙公主賜金二百斤民間猶謂蕭家公主其日有黃衣中貴騎疾馬來延亞之入宮闕甚嚴呼公主出鬢髮著偏袖衣妝不多飾其芳姝明媚筆不可模畫侍女祇承分立左右者數百人召見亞之便館居亞之於宮題其門曰翠微宮宮人呼爲沈郎院雖備位下大夫繇公主故出入禁衛公主喜鳳簫每吹簫必翠微宮高樓上聲調遠逸能悲人聞者莫不自廢公主七月七日生亞之嘗無貺壽內史廖魯爲秦以女樂遺西戎戎王與之水犀小合亞之從廖得以獻公主主悅嘗愛重結裙帶上穆公遇亞之禮兼同列恩賜相望於道復一年春公之始平公主無疾忽卒公追傷不已將塋咸陽原公命亞之作挽歌應教而作曰泣葬一枝紅生同死不同金鈿墜芳草香繡滿春風舊日聞簫處高樓當月中梨花寒食夜深閉翠微宮進公公讀詞善之時宮中有出聲若不忍者公隨泣下又使亞之作墓誌銘獨憶其銘曰白楊風哭兮石螯鬢莎雜英滿地兮春色煙和朱愁粉瘦兮不生綺羅深深埋玉兮其恨如何亞之亦送葬咸陽宮中十四人殉亞

之以悼悵過戚被病猶在翠微宮然處殿外特室不居宮中矣居月餘病良已公謂亞之曰本以小女將託久要不謂不得周奉君子而先物故弊秦區區小國不足辱大夫然寡人每見子卽不能不悲悼大夫盍適大國乎亞之對曰臣無狀肺腑公室待罪右庶長不能從死公主幸免罪戾使得歸骨父母國臣不忘君恩如日將去公追酒高會聲秦聲舞秦舞舞者擊鼙拊髀鳴鳴而音有不快聲甚怨公執酒亞之前曰予顧此聲少善願沈郎賡揚歌以塞別公命趣進筆硯亞之受命立爲歌辭曰擊體舞恨滿煙光無處所淚如雨欲擬著辭不成語金鳳銜紅舊綉衣幾度宮中同看舞人間春日正歡樂日暮春風何處去歌卒授舞者雜其聲而和之四座皆泣旣再拜辭去公復命至翠微宮與公主侍人別重入殿內時見珠翠遺碎青階下窗紗檀點依然宮人泣對亞之亞之感咽良久因題宮門詩曰君王多感放東歸從此秦宮不復期春景自傷秦喪主落花如雨淚臙脂竟別去公命車駕送出函谷關出關已送吏曰公命盡此且去亞之與別語未卒忽驚覺臥邸舍明日亞之爲友人崔九萬具道之九萬博陵人諳古謂余曰皇覽云秦穆公葬雍橐泉祈年宮下非其神靈憑

乎亞之更求得秦時地志說如九萬言嗚呼弄玉既僊矣惡又死乎

張生

有張生者家在汴州中牟縣東北赤城坂以饑寒一旦別妻子遊河朔五年方還自河朔還汴州晚出鄭州門到板橋已昏黑矣乃下道取陂中逕路而歸忽於草莽中見燈火熒煌賓客五六人方宴飲次生乃下驢以詣之相去十餘步見其妻亦在坐中與賓客語笑方洽生乃蔽形於白楊樹間以窺之見有長鬚者持盃請措大夫人歌生之妻文學之家幼習詩禮甚有篇詠欲不爲唱四座勤請乃歌曰歎衰草絡緯聲切切良人一去不復還今夕坐愁鬢如雪長鬢云勞歌一盃飲訖酒至白面年少復請歌張妻曰一之謂甚其可再乎長鬢持一籌筯云請置觥有拒請歌者飲一鍾歌舊詞中笑語准此罰於是張妻又歌曰勸君酒君莫辭落花徒繞枝流水無返期莫恃少年時少年能幾時酒至紫衣者復持盃請歌張妻不悅沉吟良久乃歌曰怨空闌秋日亦難暮夫壻斷音書遙天鴈空度酒至黑衣胡人復請歌張妻連唱三四曲聲氣不續沉吟未唱間長鬢拋觥云不合推辭乃酌一鍾張妻涕泣而飲復唱送

胡人酒曰切切夕風急露滋庭草濕良人去不回焉知掩閨泣酒至綠衣少年持盃
日夜已久恐不得從容卽當睽索無辭一曲便望歌之又唱云螢火穿白楊悲風入
荒草疑是夢中遊愁迷故園道酒至張妻長鬚歌以送之云花前始相見花下又相
送何必言夢中人生盡如夢酒至紫衣胡人復請歌云須有豔意張妻低頭未唱間
長鬚又拋一觥於是張生怒捫足下得一瓦擊之中長鬚頭再發一瓦中妻額闐然
無所見張君謂其妻已卒慟哭連夜而歸及明至門家人驚喜出迎張君問其妻婢
僕曰娘子夜來頭痛張君入室問妻病之由曰昨夜夢草莽之處有六七人遍令飲
酒各請歌孥凡歌六七曲有長鬚者頻拋觥方飲次外有發瓦來第二中孥額因驚
覺乃頭痛張君因知昨夜所見乃妻夢耳

劉道濟

光化中有文士劉道濟止於天台山國清寺嘗夢見一女子引生入窗下有側栢樹
葵花遂爲伉儷後頻於夢中相遇自不曉其故無何於明州奉化縣古寺內見有一
窗側栢葵花宛是夢所遊有一客官人寄寓於此室女有美才貧而未聘近中心疾

而生所遇乃女之魂也又有彭城劉生夢入一倡樓與諸輩狎飲爾後但夢便及彼處自疑非夢所遇之姬芳香常襲衣亦心邪所致聞於劉山甫也

夢遊錄終



古今說海

吳保安傳

說淵四 別傳四

吳保安字永固河北人任遂州方義尉其鄉人郭仲翔卽元振從姪也仲翔有才學元振將成其名宦會南蠻作亂以李蒙爲姚州都督帥師討焉蒙臨行辭元振元振乃見仲翔謂蒙曰弟之孤子未有名宦子姑將行如破賊立功某在政事當接引之俾其糜薄俸也蒙諾之仲翔頗有幹用乃以爲判官委之軍事至蜀保安寓書於仲翔曰幸共鄉里籍甚風猷雖曠不展拜而心常慕仰吾子國相猶子幕府碩才果以良能而受委寄李將軍秉文兼武受命專征親綰大兵將平小寇以將軍英勇兼足下才賢師之克殄功在旦夕保安幼而嗜學長而專經才乏兼人官從一尉僻在劍外地邇蠻陬鄉國數千關河阻隔况此官已滿後任難期以保安之不才厄選曹之格限更思微祿豈有望焉將歸老丘園轉死溝壑側聞吾子急人之憂不遺鄉曲之情忽垂特達之眷使保安得執鞭弭以奉周旋錄及細微薄霑功效承茲凱入得預末班是吾子丘山之恩卽保安銘鏤之日非敢望也願爲圖之幸照其款誠而寬其

造次專策驚蹇以望招攜仲翔得書深感之卽言於李將軍召爲管記未至而蠻賊轉逼李將軍至姚州與戰破之乘勝深入蠻覆而敗之李身死軍沒仲翔爲虜蠻夷利漢財物其沒落者皆通音耗令其家贖之人三十四保安既至姚州適值軍沒遲留未返而仲翔於蠻中間關致書於保安曰永固無恙頃辱書未報值大軍已發深入賊庭果逢撓敗李公戰沒吾爲囚俘假息偷生天涯地角顧身世已矣念鄉國惓然才謝鍾儀居然受縶身非箕子且見爲奴海畔牧羊有類於蘇武宮中射鴈寧期於李陵吾自陷蠻夷備嘗艱苦肌膚毀剔血淚滂沱生人至艱吾身盡受以中華世族爲絕域窮囚日居月諸暑退寒襲思老親於舊國望松檟於先塋忽發狂腦臆流慟不知涕之無從行路見吾猶爲傷愍吾與永固雖未披款而鄉里先達風味相親想覩光儀不離夢寐昨蒙枉問承間便言李公素知足下才名則請爲管記大軍去遠足下來遲乃足下自後於戎行非僕遲遣於鄉曲也足下門傳餘慶天祚積善果事期不入而身名並全向若早事麾下同參幕府則絕域之人與僕何異吾今在厄力屈計窮而蠻俗沒留許親族往贖以吾國相之姪不同衆人乃苦相邀求緝干

匹此信通間仍索百縑願足下早附白書報吾伯父宜以時到得贖吾還使亡魂復歸死骨更肉惟望足下耳今日之事請不辭勞若吾伯父已去廟堂難可諮啓卽願足下親脫石父解夷吾之驂往贖華元類宋人之事濟物之道古人猶難以足下道義素高名節特著故有斯請而不生疑若足下不見哀矜猥同流俗則僕生爲俘囚之豎死則蠻夷之鬼耳更何望哉已矣吳君無落吾事保安得書甚傷之時元振已卒保安乃爲報許贖仲翔仍傾其家得絹二百匹因往嵩州十年不歸經營財物前後得絹七百匹數猶未至保安素貧窶妻子又在遂州貪贖仲翔遂與家絕每於人有得雖尺布升粟皆漸積之後妻子饑寒不能自立其妻乃率弱子駕一驢自往瀘南求保安所在於途中糧盡猶去姚州數百里其妻計無所出因哭於路左哀感行人時姚州都督楊安居乘驛赴郡見保安妻哭異而訪之妻曰妾夫遂州方義尉吳保安以友人沒番丐而往贖因住姚州棄妾母子十年不通音問妾今貧苦往尋保安糧乏路長是以悲哭安居大奇之謂曰吾前至驛當候夫人濟其所乏既至驛安居賜保安妻錢數千給乘令進安居馳至郡先求保安見之執其手升堂謂保安曰

吾嘗讀古人書見古人行事不謂今日親親於公何分意情深妻子意淺捐棄家室求贖友朋而至是乎我見公妻來思公道義乃心勤佇願見顏色吾今初到無物助公且於庫中假官絹四百匹濟公此用待友人到後吾方徐爲填還保安喜取其絹令蠻中通信者持往向二百日而仲翔至姚州形狀憔悴殆非人也方與保安相識語相泣也安居曾事郭尙書則爲仲翔洗沐賜衣裝引與同坐宴樂之安居重保安行事甚寵之於是令仲翔攝治下尉仲翔久於蠻中知其款曲使人於蠻洞市女口十人皆有姿色既至因辭安居歸北且以蠻口贈之安居不受曰吾非市井之人豈待報邪欽吳生分義故人成事耳公有親老在北且充甘脆之資仲翔謝曰鄙身得還公之恩也微命得全公之賜也翔雖瞑目敢忘大造但此蠻口固爲公求來公今見辭翔以死請安居難違乃見其小女曰公旣頻繁有言不敢違公雅意此女最小常所鍾愛今爲此女受公一小口耳因辭其九人而保安亦爲安居厚遇大獲資糧而去仲翔到家辭親十五年矣卻至京以功授蔚州錄事參軍則迎歲到官兩歲又以優授代州戶曹參軍秩滿內憂葬畢因行服幕次乃曰吾賴吳公見贖故能拜

職養親今親歿服除可以行吾志矣乃行求保安而保安自方義尉選授眉州彭山丞仲翔遂至蜀訪之保安秩滿不能歸與其妻皆卒於彼權窳寺內仲翔聞之哭甚哀因製縗麻環經加杖自蜀郡徒跣哭不絕聲遂至彭山設祭酌畢乃出其骨每節皆墨記之墨記骨節書其次第恐墓斂時有失也盛於練囊又出其妻骨亦墨記貯於竹籠而徒跣親負之行數千里至魏郡保安有一子仲翔愛之如弟盡以家財二十萬厚葬保安仍刻石頌美親廬墓側行服三年既而爲嵐州長史又加朝散大夫攜保安子之官爲娶妻恩養甚至仲翔德保安不已天寶十二載詣闕讓朱紱及官於保安之子以報時人甚高之初仲翔之沒也賜蠻酋爲奴其主愛之飲食與之等經歲仲翔思北因逃歸追而得之轉賣與南洞洞主嚴惡得仲翔苦役之鞭笞甚至仲翔棄而走又被逐得更賣南洞中其洞號菩薩蠻仲翔居中經歲困厄復走蠻又追得之復賣他洞洞主得仲翔怒曰奴好走難禁止耶乃取兩板各長數尺令仲翔立於板以釘自足背釘之釘達於木每役使常帶二木行夜則納地檻中親自鑰閉仲翔二足經數年瘡方愈木鑰地檻如此七年仲翔初不堪其憂保安之使人往贖也初得仲翔之

古今說海 說淵乙集 吳保安傳

首主展轉爲取之故仲翔得歸焉

吳保安傳終

古今說海

崑崙奴傳

說淵五別傳五

唐大厯中有崔生者其父爲顯僚與蓋天之勳臣一品者熟生是時爲千牛其父使往省一品疾生少年容貌如玉性稟孤介舉止安詳發言清雅一品命妓軸簾召生入室生拜傳父命一品忻然慕愛命坐與語時三妓人豔皆絕代居前以金甌貯緋桃而擊之沃以甘酪而進一品遂命衣紅綃妓者擊一甌與生食生少年赧妓輩終不食一品命紅綃妓以匙而進之生不得已而食妓哂之遂告辭而去一品曰郎君閒暇必須一相訪無閒老夫也命紅綃送出院時生回顧妓立三指又反掌者三然後指胸前小鏡子云記取餘更無言生歸達一品意返學院神迷意奪語減容沮恍然凝思日不暇食但吟詩曰悞到蓬山頂上遊明璫玉女動星眸朱扉半掩深宮月應照瓊芝雪豔愁左右莫能究其意時家中有崑崙磨勒顧瞻郎君曰心中有何事如此抱恨不已何不報老奴生曰汝輩何知而問我襟懷間事磨勒曰但言當爲郎君釋解遠近必能成之生駭其言異遂具告知磨勒曰此小事耳何不早言之而自

苦耶生又白其隱語勒曰有何難會立三指者一品宅中有十院歌姬此乃第三院耳反掌三者數十五指以應十五日之數胸前小鏡子十五夜月圓如鏡令耶君來耳生大喜不自勝謂勒曰何計而能達我鬱結耶磨勒笑曰後夜乃十五夜請深青絹兩疋爲耶君製束身之衣一品宅有猛犬守歌妓院門外常人不得輒入入必噬殺之其警如神其猛如虎卽曹孟海州之犬也世間非老奴不能斃此犬耳今夕當爲耶君搗殺之遂宴犒以酒肉至三更攜鍊椎而往食頃而回曰犬已斃訖固無障塞耳是夜三更與生衣青衣遂負而逾十重垣乃入歌妓院內止第三門繡戶不扃金釭微明惟聞妓長嘆而坐若有所伺翠鬢初墜紅臉纔舒幽恨方深殊愁轉結但吟詩曰深谷鶯啼恨院香偷來花下解珠璫碧雲飄斷音書絕空倚玉蕭愁鳳凰侍衛皆寢隣近聞然生遂掀簾而入姬默然良久躍下榻執生手曰知耶君穎悟必能默識所以手語耳又不知耶君有何神術而至此生具告磨勒之謀負荷而至姬曰磨勒何在曰簾外耳遂召入以金甌酌酒而飲之姬白生曰某家本居朔方主人擁旄逼爲姬僕不能自死尙且偷生臉雖鉛華心頗鬱結縱玉筯舉饌金鑪泛漿雲屏

而每近綺羅繡被而常眠珠翠皆非所願如在桎梏賢爪牙既有神術何妨爲脫狴牢所願旣伸雖死不悔請爲僕隸願侍光容又不知郎君高意如何生愀然不語磨勒曰娘子旣堅確如是此亦小事耳姬甚喜磨勒請先爲姬負其囊橐妝奩如此三復焉然後曰恐遲明遂負生與姬而飛出峻垣十餘重一品家之守禦無有警者遂歸學院而匿之及旦一品家方覺又見犬已斃一品大駭曰我家門垣從來邃密扁鐫甚嚴勢似飛躑寂無形跡此必是一大俠矣無更聲聞徒爲患禍耳姬隱崔生家二歲因花時駕小車而遊曲江爲一品家人潛誌認遂白一品一品異之召崔生而詰之事懼而不敢隱遂細言端由皆因奴磨勒負荷而去一品曰是姬大罪過但郎君驅使踰年卽不能問是非某須爲天下人除害命甲士五十人嚴持兵仗圍崔生院使擒磨勒磨勒遂持匕首飛出高垣瞥若翅翎疾同鷹隼攢矢如雨莫能中之頃刻之間不知所向然崔家大驚愕後一品悔懼每夕多以家童持劍戟自衛如此周歲方止十餘年崔家有人見磨勒賣藥於洛陽市容髮如舊耳

崑崙奴傳終



古今說海

鄭德璘傳

說淵六 別傳六

貞元中湘潭尉鄭德璘家居長沙有親表居江夏每歲一往省焉中間涉洞庭歷湘潭多遇老叟棹舟而粥菱芡雖白髮而有少容德璘與語多及玄解詰曰舟無糗糧何以爲食叟曰菱芡耳德璘好酒每挈松醪春過江夏遇叟無不飲之叟飲亦不甚媿荷德璘抵江夏將返長沙駐舟於黃鶴樓下傍有巖買韋生者乘巨舟亦抵於湘潭其夜與璘舟告別飲酒韋生有女居於舟之柁檣璘舟女亦來訪別二女同處笑語夜將半聞江中有秀才吟詩曰物觸輕舟心自知風恬浪靜月光微夜深江上解愁思拾得紅蕖香惹衣璘舟女善筆札因覩韋氏粧奩中有紅箋一幅取而題所聞之句亦哦吟良久然莫曉誰人所製也及旦東西而去德璘舟與韋氏舟同離鄂渚信宿及暮又同宿至洞庭之畔與韋生舟楫頗以相近韋氏美而艷瓊英膩雲蓮蕊瑩波露濯舜姿月鮮珠彩於水窗中垂鈎德璘因窺見之甚悅遂以紅綃一尺上題詩曰纖手垂鈎對水窗紅蕖秋色艷長江既能解珮投交甫更有明珠乞一雙彊以

紅綃惹其鈎女因收得吟翫久之然雖諷讀卽不能曉其義女不工刀札又恥無所報遂以鈎絲而投夜來隣舟女所題紅牋者德璘謂女所製疑思頗悅喜暢可知然莫曉詩之意義亦無計遂其款曲由是女以所得紅綃繫臂自愛惜之明月清風章舟遽張帆而去風勢將緊波濤恐人德璘小舟不敢同越然意殊悵悵恨將暮有漁人語德璘曰向者賈客巨舟已全家沒於洞庭耳德璘大駭神思恍惚悲惋久之不能排抑將夜爲吊江姝詩二首曰湖面狂風且莫吹浪花初綻月光微沉潛暗想橫波淚得共鮫人相對垂又曰洞庭風軟荻花秋新沒青娥細浪愁淚滴白蘋君不見月明江上有輕鷗詩成酌而投之精貫神祇至誠感應遂感水神持詣水府府君覽之召溺者數輩曰誰是鄭生所愛而韋氏亦不能曉其來由有主者搜臂見紅綃而語府君曰德璘異日是吾邑之明宰况曩有義相及不可不曲活爾命因召主者攜韋氏送鄭生韋氏視府君乃一老叟也遂主者疾趨而無所礙道將盡覩一大池碧水汪然遂爲主者推墮其中或沉或浮亦甚困苦時已三更德璘未寢但吟紅牋之詩悲而益苦忽有物觸舟然舟人已寢德璘遂秉炬照之見衣服彩綉是似人物驚而

拯之乃韋氏也繫臂紅綃尙在德璘喜驟良久女蘇息及曉方能言乃說府君感君而活我命德璘曰府君何人也終不省悟遂納爲室感其異也將歸長沙後三年德璘當調選欲謀醴陵令韋氏曰不過作巴陵耳德璘曰子何以知韋氏曰向者水府君言是吾邑之明宰洞庭乃屬巴陵此可驗矣德璘志之選果得巴陵令及至巴陵縣使人迎韋氏舟楫至洞庭側值逆風不進德璘使備篙工者五人而迎之內一老叟挽舟若不爲意韋氏怒而唾之叟回顧曰我昔水府活汝性命不以爲德今反生怒韋氏乃悟恐悸召叟登舟拜而進酒果叩頭曰吾之父母當在水府可省覲否曰可須叟舟楫似沒於波然無所苦俄到往時之水府大小倚舟號慟訪其父母父母居止儼然第舍與人世無異韋氏詢其所須父母曰所溺之物皆能至此但無火化所食惟菱芡耳持白金噐數事而遺女曰吾此無用處可以贈爾不得久停促其相別韋氏遂哀慟別其父母叟以筆大書韋氏巾曰昔日江頭菱芡人蒙君數飲松醪春活君家室以爲報珍重長沙鄭德璘書訖叟遂爲僕侍數百輩自舟迎歸府舍俄頃舟却出於湖畔一舟之人咸有所覩德璘詳詩意方悟水府老叟乃昔日鬻菱芡

者歲餘有秀才崔希周投詩卷於德璘內有江上夜拾得芙蓉詩卽韋氏所投德璘紅牋詩也德璘疑詩乃詰希周對曰數年前泊輕舟於鄂渚江上月明時當未寢有微物觸舟芳馨襲鼻取而視之乃一束芙蓉也因而製詩旣成諷咏良久敢以實對德璘歎曰命也然後更不敢越洞庭德璘官至刺史

古今說海

李章武傳

說淵七別傳七

李章武字飛 其先中山人生而敏博遇事便了工文學業皆得極至雖弘道自高
惡爲潔飾而美貌閒容卽之溫然少與清河崔信友善信亦雅士多聚古物以章武
精敏每咨訪辯論皆洞達玄微研究原本時人比之張華貞元三年崔信任華州別
駕章武自長安詣數日出行於市北街見一婦人甚美因給信云須州外與親故知
聞遂賃舍於美人之家主人姓王此則其子婦也乃悅而私焉居月餘日所計用直
三萬餘子婦所供費倍之旣而兩心克諧情好彌切無何章武繫事告歸長安殷勤
敘別章武留交頸鴛鴦綺一端仍贈詩曰鴛鴦綺 知結幾千絲別後尋交頸應
傷未別時子婦答白玉指環一雙贈詩曰念子還相思見環重相憶願君永持翫循
環無終極章有僕楊果者子婦齎錢一千以獎其敬事之勤旣別積八九年章武家
長安亦無從與之相聞至貞元十一年因友人張元宗寓居下邳縣章武又自京師
與元會忽思曩好乃廻車涉渭而訪之日暝達華州將舍於王氏之室至其門則聞


無行跡但外有寶榻而已章武以爲下里或廢業卽農暫居郊野或親賓邀聚未始歸復但休止其門將別適他舍見東隣之婦就而訪之乃云王氏之長者皆捨業而出遊其子婦歿已再周矣又詳與之談卽云某姓楊第六爲東隣妻復訪郎何姓章武具語之又云曩曾有僕姓楊名果乎曰有之因泣告曰某爲里中婦五年與王氏善交嘗曰我夫室猶如傳舍閱人多矣其於往來見調者皆殫財窮產甘辭厚誓未嘗動心頃歲有李十八郎曾舍於我家我初見之不覺自失後遂私侍枕席實蒙歡愛今與之別累年矣思慕之心或竟日不食終夜無寢我家人故不可託復被彼夫東西不時會遇脫有至者願以物色名氏求之如不參差相託祇奉并語深意但有僕夫楊果卽是不二三年子婦寢疾臨死復見託曰我本寒微曾辱君子厚顧心常感念久以成疾自料不治曩所奉託萬一至此願申九泉啣恨千古睽離之歡仍乞留止此舍冀神會於髣髴之中章武力求鄰婦爲開門命從者市薪藟食物方將具裋席忽有一婦人持帚出房掃地鄰婦亦不之識章武因訪所從來云是舍中人又逼而詰之卽徐曰王家亡婦感郎恩情將見會恐生怪怖故使相聞章武許諾云章

武所由來者誠爲此也雖顯晦殊途人皆忌憚而思念情至實所不疑語畢執帚人欣然而去逡巡映門卽不復見乃具飲饌呼祭自食飲畢安寢至二更許燈在床之東南忽爾稍暗如此再三章武心知有變因命移燭背牆置室東南隅旋聞西北角悉窣有聲如有人形冉冉而至五六步卽可辨其狀貌衣服乃主人子婦也與昔見不異但舉止浮急音調輕清耳章武下床迎擁攜手款若平生之歡自云在冥錄以來都忘親戚但思君子之心如平昔耳章武倍與狎暱亦無他異但數請令人視明星若出當須還不可久住每交歡之暇卽懇託在鄰婦楊氏云非此人誰達幽恨至五更有人告可還子婦泣下牀與章武連臂出門仰望天漢遂嗚咽悲怨却入室自於裙帶上解錦囊囊中取一物以贈之其色紺碧質又堅密似玉而冷狀如小葉章武不之識也子婦曰此所謂韎韞寶出崑崙玄圃中彼亦不可得妾近與西岳玉京夫人戲見此物在衆寶璫上愛而訪之夫人遂假以相授云洞天羣仙每得此一寶皆爲光榮以郎奉玄道有精識故以投獻常願寶之此非人間之有遂贈詩曰河漢已傾斜神魂欲超越願郎更廻抱終天從此訣章武取白玉寶簪一以酬之并答詩

日分從幽顯隔豈謂有佳期甯辭重重別所歎去何之因相持泣良久子婦又贈詩
曰昔辭懷後會今別便終天新悲與舊恨千古問窮泉章武答曰後期杳無約前恨
已相尋別路無行信何因得寄心款曲敍別訖遂却赴西北隅行數步猶回顧拭淚
云李郎無捨念此泉下人復哽咽佇立視天欲明急趨至角卽不復見但空室窅然
寒燈半滅而已章武乃促裝却自下邳歸長安武定堡下邳羣官與張元宗攜酒宴
飲旣酣章武懷念因卽事賦詩曰水不西歸月暫圓令人恨望古城邊蕭條明早分
岐路知更相逢何歲年吟畢與羣官別獨行數里又自諷誦忽聞空中有歎賞音調
淒惻更審聽之乃王氏子婦也自云冥中各有地分今於此則無日交會知郎思眷
故冒險司之責遠來奉送千萬自愛章武愈感之及至長安與道友隴西李訪話亦
感其誠而賦詩曰石沉遼海關劍別楚天長會合知無日離心滿夕陽章武旣享東
平丞相府因開召玉工視所得鞞鞞寶工亦不知不敢雕刻後奉使大梁又召玉工
羸能辨乃因其形雕作罽葉象奉使上京每以此物貯懷中至市東街偶見一胡僧
忽近馬叩頭云君有寶玉在懷乞一見爾乃引於靜處開視僧捧翫移時云此天上

至物非人間有也章武後往來華州訪遺楊六娘至今不絕

李章武傳終



古今說海

韋自東傳

說淵八 別傳八

貞元中有韋自東者義烈之士也嘗遊太白山棲止段將軍莊段亦素知其壯勇者一日與自東眺望山谷見一徑甚微若舊有行跡自東問主人曰此何詣也將軍曰昔有二僧居此山頂殿宇宏壯林泉甚佳蓋開元中萬廻師弟子所建也似驅役鬼工非人力所能及或聞樵者說其僧爲野叉所食今絕蹤二三年矣又聞人說有二野叉在於此山亦無人敢窺焉自東怒曰余操心在平侵暴野叉何類而敢噬人今夕必挈野叉首至於門下將軍止之曰暴虎馮河死而無悔自東不顧仗劍奮衣而往勢不可遏將軍悄然曰韋生當其咎耳自東捫蘿躡石至於精舍悄寂無人覩二僧房大敞其戶履舄俱在衾枕儼然而塵埃凝積其上又見佛堂內細草茸茸如有巨物偃寢之處四壁多挂野菟玄熊之類或庖炙之餘亦有鍋鑊柴薪自東乃知樵者之言不謬耳度其野叉未至遂拔柏樹徑大如椀去枝葉爲大杖扁其戶以石佛拒之是夜月白如晝夜未分野叉挈鹿而至怒其扁鑄大叫以首觸戶折其石佛而

踣於地自東遂以柏樹搯其腦再舉而斃之拽之入室又闔其扉頃之復有野父繼至似怒前歸者不接已亦哮吼觸其扉復踣於戶闔又搯之亦斃自東知雌雄已殞應無儕類遂掩關烹鹿而食及明斷二野又首挈餘鹿而示段段大駭曰眞周處之儔矣乃烹鹿飲酒盡歡遠近觀者如堵有道士出於稠人中揖自東曰某有衷懇欲披告於長者可乎自東曰某一生急人之急何爲不可道士曰某棲心道門懇志靈藥非一朝一夕耳三二年前神仙爲吾配合龍虎丹一爐據其洞而修之有日矣今靈藥將成而數有妖魔入洞就爐擊觸藥幾飛散思得剛烈之士仗劍衛之靈藥儻成當有分惠未知能一行否自東踊躍曰乃平生所願也遂仗劍從道士而去躋險躡峻當太白之高峯將半有一石洞可百餘步卽道士燒丹之室唯弟子一人道士約曰明晨五更初請君仗劍當洞門而立若見有怪物但以劍擊之自東曰謹奉教久立燭於洞門外伺之俄頃果有巨虺長數丈金目雪牙毒氣氤鬱將欲入洞自東以劍擊之似中其首俄頃若輕霧而化去食頃又有一女子顏色艷麗執芰荷之花緩步而至自東又以劍拂之若雲氣而滅食頃將欲曙有道士乘雲駕鶴導從甚嚴

勞自東曰妖魔已盡吾弟子丹將成矣吾當來爲證也盤旋候明而入語自東曰喜汝道士丹成今有詩一首汝可繼和詩曰三秋稽顙叩真靈龍虎交時金液成絳雪既凝身可度蓬壺頂上綵雲生自東詳詩意曰此道士之師遂釋劍而禮之俄而突入藥鼎爆裂更無遺在道士慟哭自東悔恨自咎而已二人因以泉滌其鼎噐而飲之自東後更有少容而適南嶽莫知所止今段將軍莊尙有野叉髑髏見在道士亦莫知所之

韋自東傳終



古今說海

趙合傳


說淵九別傳九

進士趙合貌溫氣直行義甚高太和初遊五原路經砂磧觀物悲歡遂飲酒與僕使並醉因寢於砂磧中宵半醒月色皎然聞砂中有女人悲吟曰雲鬢消盡轉蓬稀埋骨窮荒無所依牧馬不嘶沙月白孤魂空逐鴈南飛合遂起而訪焉果有一女子年猶未笄容色絕代語合曰某姓李氏居於奉天有姊嫁洛源鎮帥因往省焉道遭黨羌所虜至此擄殺刳其首飾而去後爲路人所悲掩於沙內經今三載知君頗有心義儻能爲歸骨於奉天城南小李村卽某家粉榆耳當有奉報合許之請示其掩骼處女子感泣告之合遂收其骨包於橐中伺旦俄有紫衣丈人躍騎而至揖合曰知子仁而義信而廉女子咨祈尙有感激我李文悅尙書也元和十三年分守五原爲犬戎三十萬圍逼城池之四隅兵各厚數十里連弩灑雨飛梯排雲穿壁決壕晝夜攻擊城中負戶而汲者矢如蝟毛當其時禦捍之兵纔三千激勵其居人婦女老幼負土而立者不知寒餒犬戎於城北建獨脚樓高數十丈城中巨細咸得窺之某遂

設奇定計其樓立毀羌酋愕然以爲神功又語城中人曰慎勿拆屋燒吾且爲汝取薪積於城下許人鉤上又太陰稍晦卽聞城之四隅多有人物行動聲云以夜攻城城中懾慄不敢暫安某曰不然潛以鐵索下燭而照之乃空驅牛羊行脅其城兵士稍安又西北隅被攻摧十餘丈將遇昏晦羣胡大喜縱酒狂歌云候明晨而入某以馬弩五百張而擬之遂下皮牆障之一夕併工暗築不使有聲滌之以水時嚴寒來日氷堅城之瑩如銀不可攻擊又羌酋建大將之旗乃贊普所賜立之於五花營內某夜穿壁而奪之如飛衆羌號泣誓請還前擄掠之人而贖其旗納其老幼婦女百餘人待其盡歸然後擲旗而還之時邠涇救兵二萬人臨其境股慄不進如此相持三十七日羌酋乃遙拜曰此城內有神將吾今不敢欺遂卷甲而去不信宿達宥州一晝夜而攻破其城老小三萬人盡遭虜去以此利害則余之功及斯城不細但當時賞罰無章不得仗節出此城空加一貂蟬耳余聞鍾陵韋大夫舊築一隄將防水潦後三十年尙有百姓及廉問周公感其功而奏立德政碑峨然若余當時守壁不堅城中之人盡爲羌胡之賤隸豈存今日子孫乎知子有心請白其百姓諷其州尊

與立德政碑足矣言訖長揖而去合既受教就五原以語百姓及刺史俱以爲妖不聽惆悵而返至沙中又逢昔日神人謝曰君爲言五原無知之俗刺史不明此城當有大災方與祈求幽府吾言於五原之事不諧此意亦息其禍不三旬而及矣言訖而沒果如期災生五原城饑死萬人老幼相食合挈女骸骨至奉天訪得小李村而葬之及明日道側遇昔日女子曰感君之義吾之大父乃貞元中得道之士有演參同契續元經子能窮之龍虎之丹不日而成矣合受之女子已沒合遂捨舉究其玄微居於少室燒之一年能使瓦礫爲金寶二年能起斃者三年餌之度世今時有人遇之於嵩嶺耳

趙合傳終



古今說海

杜子春傳

說淵十別傳十

杜子春者周隋間人少落魄不事家產以心氣閒縱嗜酒邪遊資產蕩盡投於親故皆以不事事之故見棄方冬衣破腹空徒行長安中日晚未食彷徨不知所往於東市西門饑寒之色可掬仰天長吁有一老人策杖於前問曰君子何歎子春言其心且憤其親戚疎薄也感激之氣發於顏色老人曰幾緡則豐用子春曰三五萬則可以活矣老人曰未也更言之十萬曰未也乃言百萬亦曰未也曰三百萬乃曰可矣於是袖出一緡曰給子今夕明日午時俟子於西市波斯邸慎無後期及時子春往老人果與錢三百萬不告姓名而去子春既富蕩心復熾自以爲終身不復羈旅也乘肥衣輕會酒徒徵絲竹歌舞于倡樓不復以治生爲意一二年間稍稍而盡衣服車馬易貴從賤去馬而驢去驢而徒條忽如初既而復無計自嘆於市門發聲而老人到握其手曰君復如此奇作吾將復濟子幾緡方可子春慚不對老人因逼之子春愧謝而已老人曰明日午時來前期處子春忍愧而往得錢一千萬未受之初發


憤以爲念此謀生石季倫猗頓小豎耳錢旣入手心又翻然縱適之情又却如故不三四年間貧過舊日復遇老人於故處子春不勝其愧掩面而走老人牽裾止之曰嗟乎拙謀也因與三千萬曰以此不瘥則子貧在膏肓矣子春曰吾落魄邪遊生涯罄盡親戚豪族無相顧者獨此叟三給我我何以當之因謂老人曰吾得此人間之事可以立孤孀可以足衣食於名教復圓矣感叟深惠立事之後唯叟所使老人曰吾心也子治生畢來歲中元見我於老君雙檜下子春以孤孀多寓淮南遂轉資楊州買良田百頃塾中起甲第要路置邸百餘間悉召孤孀分居第中婚嫁甥姪遷祔旅糶恩者麗之讐者復之旣畢事及期而往老人者方嘯于二檜之陰遂與登華山雲臺峯入四十里餘見一居處室屋嚴潔非常人居綵雲遙覆鸞鶴飛翔其上有正堂中有藥爐高九尺餘紫焰光發灼煥窻戶玉女數人環爐而立青龍白虎分據前後其時日將暮老人者不復俗衣乃黃冠絳帔士也持白石三丸酒一卮遺子春令速食之訖取一虎皮鋪于內西壁東向而坐戒曰慎勿語雖尊神惡鬼夜叉猛獸地獄及君之親屬爲所囚縛萬苦皆非真實但當不動不語耳安心莫懼終無所苦當

一心念吾所言言訖而去子春視庭唯一巨甕滿中貯水而已道士適去而旌旗戈甲千乘萬騎遍滿崖谷來呵叱之聲動天地有一人稱大將軍身長丈餘人馬皆着金甲光芒射人親衛數百人拔劍張弓直入堂前呵曰汝是何人敢不避大將軍左右竦劍而前逼問姓名又問作何物皆不對問者大怒催斬爭射之聲如雷竟不應將軍者拗怒而去俄而猛虎毒龍狡獬獅子蝮蛇萬計哮吼拏攫而前爭欲搏噬或跳過其上子春神色不動有頃而散既而大雨滂澍雷電晦暝火輪走其左右電光掣其前後目不得開須臾庭際水深丈餘流電吼雷勢若山川開破不可制止瞬息之間波及坐下子春端坐不顧未頃而散將軍者復來引牛頭獄卒奇貌鬼神將大鑊湯而置子春前長槍刃又四面迨迎傳命曰肯言姓名卽放不肯言卽當心叉取置之鑊中又不應因執其妻來摔於堦下指曰言姓名免之又不應乃鞭捶流血或射或斫或煮或燒苦不可忍其妻號哭曰誠爲陋拙有辱君子然幸得執巾櫛奉事十餘年矣今爲尊鬼所執不勝其苦不敢望君匍匐拜乞但得公一言卽全性命矣人誰無情君乃忍惜一言雨淚庭中且睨且罵子春終不顧將軍且曰吾不能毒汝

妻耶令取判確從脚寸寸判之妻叫哭愈急竟不顧之將軍曰此賊妖術已成不可使久在世間勅左右斬之斬訖魂魄被領見閻羅王王曰此乃雲臺峯妖民乎促付獄中於是鎔銅鐵杖確搗磴磨火坑鑊湯刀山劍林之苦無不備嘗然心念道士之言亦似可忍竟不呻吟獄卒告受罪畢王曰此人陰賊不合得作男宜令作女人配生宋州單父縣丞王勤家生而多病針灸醫藥之苦略無停日亦嘗墜火墮床痛苦不濟終不失聲俄而長大容色絕代而口無聲其家目爲啞女親戚相狎侮之萬端終不能對同鄉有進士盧珪者聞其容而慕之因媒氏求焉其家以啞辭之盧曰苟爲妻而賢何用言矣亦足以戒長舌之婦乃許之盧生備禮親迎爲妻數年恩情甚篤生一男僅二歲聰慧無敵盧抱兒與之言不應多方引之終無辭盧大怒曰昔賈大夫之妻鄙其夫纔不笑爾然觀其射雉尙釋其憾今吾陋不及賈而文藝非徒射雉也而竟不言大丈夫爲妻所鄙安用其子乃持兩足以頭撲於石上應手而碎血濺數步子春愛生於心忽忘其約不覺失聲云噫噫聲未息身坐故處道士者亦在其前初五更矣其紫焰穿屋上天火起四合屋室俱焚道士嘆曰指大誤余乃如是

因提其髻投水甕中未頃火息道士前曰出吾子之心喜怒哀懼惡欲皆能忘也所未臻者愛而已向使子無噫聲吾之藥成子亦上仙矣嗟乎仙才之難得也吾藥可重煉而子之身猶爲世界所容矣勉之哉遙指路使歸子春強登臺觀焉其爐已壞中有鐵柱大如臂長數尺道士脫衣以刀子削之子春既歸愧其恩誓復自効以謝其過行至雲臺峯無人跡嘆恨而歸

杜子春傳終



古今說海

裴仙先別傳


說淵十一 別傳十一

工部尙書裴仙先年十七爲太僕寺丞伯父相國炎遇害仙先廢爲民遷嶺外仙先素剛痛伯父無罪乃於朝廷上封事請見面陳得失天后大怒召見盛氣以待之謂仙先曰汝伯父反干國之憲自貽伊戚爾欲何言仙先對曰臣今請爲陛下計安敢訴冤且陛下先帝皇后李家新婦先帝棄世陛下臨朝婦道者理當委任大臣保其宗社東宮年長復子明辟以塞天人之望今先帝登遐未幾遽自封崇私室立諸武爲王誅斥李宗自稱皇帝海內憤惋蒼生失望臣伯父至忠於李氏反誣其罪戮及子孫陛下爲計若斯臣深痛惜臣望陛下復立李家社稷迎太子東宮陛下高枕諸武獲全如不納臣言天下一動大事去矣產祿之誠可不懼哉臣今爲陛下計能用臣言猶未晚也天后怒曰何物小子敢發此言命牽出仙先猶反顧曰陛下採臣言實未晚如是者三天后令集朝臣於朝堂杖仙先至百長隸灑州仙先解衣受杖笞至十而仙先死數至九十八而蘇更二笞而畢仙先瘡甚臥驢輿中至流所卒不死

在南中數歲娶流人盧氏女生男愿盧氏卒袖先攜愿潛歸鄉歲餘事發又杖一百配北庭貨殖五年致資財數千萬袖先賢相之姪往來河西所在交二千石北庭都護府城下有夷萬帳則降胡也其可汗禮袖先以女妻之可汗唯一女念之甚贈袖先黃金馬駝牛羊甚衆袖先因而致富門下食客常數千人自北庭至東京累道置客以取東京息耗朝廷動靜不數日袖先必知之時補闕李秦授寓直中書進封事曰陛下自登極誅斥李氏及諸大臣其家人親族流放在外以臣所料且數萬人如一旦同心招集爲逆出陛下不意臣恐社稷必危讖曰代武者劉夫劉者流也陛下不殺此輩臣恐爲禍深隱天后納之夜中召入謂曰卿名秦授天以卿授朕也何啓予心卽拜考功員外郎仍知制誥賜朱綾女妓十人金帛稱是與謀發敕使十人於十道安慰流者其實賜墨敕與牧守有流放者殺之敕旣下袖先知之會賓客計議皆勸袖先入胡袖先從之日晚舍於城外束裝時有鐵騎果殺二人勇而有力以罪流袖先善待之及行使將馬牛橐駝八十頭盡裝金帛賓客家僮從之者三百餘人甲兵備足曳犀超乘者半有千里馬二袖先與妻乘之裝畢遷發料天曉人覺之已

入虜境矣既而迷失道遲明唯進一舍乃馳既明候者言酋先走都護令八百騎追之妻父可汗又令五百騎急追誠追者曰舍酋先與妻同行者盡殺之貨財爲賞追者及酋先於塞酋先勒兵與戰麾下皆殊死戰殺追騎五百人日昏二將戰死而敗縛酋先及妻與橐駝將至都護所既至械繫穿中具以狀聞待報而使者至召流人數百皆害之酋先以未報故免天后度流人已死又使使者安撫流人曰吾前使十道使安慰流人何使者不曉吾意擅加殺害深爲酷暴其輒殺流人使者並所在鎌項將至害流人處斬之以快亡魂諸流人未死或他事繫者兼家口放還由是酋先得免乃歸鄉里及唐室再造宥裴炎贈以益州大都督求其後酋先乃出授詹事丞歲中四遷遂至秦州都督再節制桂廣一任幽州帥四爲執金吾一兼御史大夫太原京兆尹太府卿凡任三品官向四十政所在有聲績號稱名臣後爲工部尙書東京留守薨壽八十六

裴酋先別傳終



古今海說

震澤龍女傳

說淵十二 一別傳十二

震澤中洞庭山南有洞穴深百餘尺有漁人茅公脫偶墮洞中旁行昇降五十餘里至一龍宮周廻四五里下有青泥至膝有宮室門闕龍以氣闢水霏如輕霧晝夜明徹守門小蛟龍張鱗奮爪拒之不得入公脫在洞數日饑食青泥若粳米旬餘忽髣髴記得歸路得去爲吳郡守具言其事事聞梁武帝召問杰公公曰此洞穴有四枝一通洞庭湖西岸一通蜀道青衣浦北岸一通羅浮兩山間穴谿一通枯桑島東穴蓋東海龍王第七女掌龍王珠藏小龍十數衛護此珠龍畏蠟愛美玉及空青而嗜燕若遣使通信可得寶珠帝聞大喜乃詔有能使者厚賞之有會稽郡鄞縣白水郎庾毗羅請行杰公曰汝五世祖燒殺鄞縣東海潭之龍百餘頭還爲龍所害汝門龍之仇也可無行乎毗羅伏實乃止於是合浦郡洛黎縣甌越羅子春兄弟二人上書自言家伐與陵水羅水龍爲婚遠祖矜能化惡龍晉簡文帝以臣祖和化龍毒今龍化縣卽是臣祖奉宅也象郡石龍剛猛難化臣祖化之今石龍縣是也東海南天台

湘川彭蠡銅鼓石頭等諸水大龍皆識臣宗祖亦知臣是其子孫請通帝命杰公曰汝家制龍石尙在否答曰在謹齋至都試取觀之公曰汝此石能制徵風召雨戎虜之龍不能制海王珠藏之龍又問曰汝有西海龍腦香否曰無公曰奈之何御龍帝曰事不諧矣公曰西海大船求龍腦香可得昔桐栢真人教揚義許謐茅容乘龍各贈制龍石十斤今亦應在請訪之帝敕命求之於茅山華龍隱居陶宏景得石兩片公曰是矣帝敕玉工以於闐舒河中美玉造小函二以桐木灰發其光末宣州空青汰取其精者用海魚膠膠之成二缶火堅之龍腦香尋亦繼至杰公曰以蠟塗子春等身及衣佩乃齋燒燕五百枚入洞穴至龍宮守門小蛟聞蠟氣俯伏不敢動乃以燒燕百事賂之令其通問以其上上者獻龍女龍女食之大嘉又上玉函青缶具陳帝旨洞中有千餘歲能變化出入人間之龍善譯時俗之言龍女知帝禮之以大珠三小珠七雜珠一石以報帝命子春乘龍等載珠還國食頃之間便至江岸已而子春薦珠帝大喜得聘通靈異獲天人之寶以珠示杰公杰公曰三珠其一一是天帝如意珠之下者其二是驪龍珠之中者七珠二是虫珠五是海蚌珠人間之上者雜珠

是蚌蛤等珠不如火珠之貴帝遍示百僚朝廷咸謂杰公虛誕莫不詰之杰公曰如意珠上上者夜光照四十餘里中者十里下者一里光之所及無風雨雷電水火刀兵諸毒厲驪珠九色上者夜光百步中者十步下者一室光之所及無蛇虺蟲豸之毒蟲珠七色而多赤其蟲六足二目目當其陷處有凹如鐵鼻蚌珠五色皆有夜光及數尺無瑕者爲之上有瑕者爲下蚌珠生於蚌腹與月盈虧蛇珠所致隋侯噲參卽其事也又問蛇鶴之辯對曰使其自適帝命杰公記蛇鶴二珠以斗餘雜珠散於殿前取大黃蛇玄鶴各十數處布珠中間於是鶴銜其珠鳴舞徘徊蛇銜其珠盤屈宛轉羣公觀者莫不歎服帝復出如意龍蟲等珠光之遠近七九八數皆如杰公之言子春在龍宮得食如花如藥如膏如飴食之香美齋食至京師得人間風日乃堅如石不可咀咽帝令秘府藏之拜子春爲奉車都尉二弟爲奉朝請賜布帛各千匹追訪公肱往不爲龍害所由爲用麻人油和蠟作照魚衣乃身有蠟氣故也

震澤龍女傳終



古今說海

袁氏傳

說淵十三別傳十三

廣德中有孫恪秀才者因下第遊於洛中至魏王池側忽有一大第土木皆新被路人指云斯袁氏之第也恪徑往扣扉無有應者戶側有小房簾帷頗潔謂伺客之所恪遂褰簾而入良久忽聞啓關者一女子光容鑒物豔麗驚人珠初滌其月華柳乍含其煙媚蘭芳靈濯玉瑩塵清恪疑主人之處子但潛窺而已女摘庭中之萱草凝思久立遂制詩曰彼見是忘憂此看同腐草青山與白雲方展我懷抱吟諷既畢容色慘然因來褰簾忽覩恪遂驚慙入戶使青衣詰之曰子何人而向於此恪乃語是稅居之士曰不幸衝突頗益慙駭幸望陳達於小娘子青衣具以告女曰某之醜拙况不修容耶君久昉簾帷當盡所覩豈敢更迴避耶願郎君少頃內廳當暫飾裝而出恪慕其容美喜不自勝語青衣曰誰氏之子曰故袁長官之女少孤更無姻戚唯與妾輩三五人據此第耳小娘子見未適人且求售也良久乃出見恪美豔愈於嚮者所覩命侍婢進茶果曰郎君既無第舍便可遷囊橐於此廳院中指青衣謂恪曰

小有所須但告此輩恪愧荷而已恪未室又覩女子之婉麗如是乃進媒而請之女亦欣然相受遂納爲室袁氏贍足巨有金縉而恪久貧忽車馬煥赫服玩華麗頗爲親友之驚訝多來詰恪恪竟不實對恪因驕倨不求名第日治豪貴縱酒狂歌如此三四歲不離洛中忽遇表兄張閑雲處士恪謂曰旣久睽間頗思從容願攜衾綃一永宵話張生如其所約及夜永將寢張生握恪手密謂之曰老兄於通門曾有所援適觀弟詞色妖氣頗濃未審別有何所遇事之周細必願見陳不然者當受禍耳恪曰不肖未有所遇張生又曰夫人稟陽精妖受陰氣魂掩魄盡人則長生魄掩魂銷人則立死故鬼怪無形而全陰也仙人無影而全陽也陰陽之盛衰魂魄之交戰在體而微有失位莫不表白於氣色嚮觀弟神彩陰侵陽位邪干正府眞精已耗識用漸墮津液傾輸根蒂浮動骨將化土顏非渥丹必爲怪異所鑠何堅隱而不剖其由也恪方驚悟遂陳娶納之因張生大駭曰卽此是也其奈之何又曰弟之忖度何以爲異恪曰豈有袁氏海內無瓜葛之親哉又辨慧多能如是以爲驗遂告張曰某一生遭迍久處凍餒因茲婚娶頗似蘇息不能負意何以爲計張生怒曰大丈夫未能

事人焉能事鬼傳云妖由人興人無釁焉妖不自作且義與身孰親身受其顧災而其鬼怪之恩義三尺童子尙以爲不可何況大丈夫乎張又曰吾有寶劍亦干將之儔亞也凡有魍魎見者滅沒前後神奇不可備數詰朝奉借儻攜密適必覩其狼狽不下昔日王君攜寶鏡而照鸚鵡也不然者則必被恩愛所迷耳明日恪遂受劍張生告去執手曰善伺其便恪遂攜劍隱於室內而終有難色袁氏俄覺大怒而謂恪曰子之窮愁我使暢泰不顧恩義遂興非爲如此用心且犬彘不食其餘豈能立節行於人世也恪既被責慙顏息慮叩頭曰受教於表兄非宿心也願以歃血爲盟更不敢有他意矣因雨泣伏地袁氏遂搜得其劍寸折之若斷藕耳恪愈懼似欲奔迸袁氏乃大笑曰張生一小子不能以道義誨其表弟使行其兇毒來當辱之然觀子之心的應不如是然吾匹君已數歲也子何慮哉恪方稍安後數日因出遇張生曰奈何使我撩虎鬚幾不脫虎口耳張生問劍之所在具以實對張生大駭曰非吾所知也深懼而不敢來謁後十餘年袁氏已鞠育二子治家甚嚴不喜參雜後恪之長安謁舊友人王相國縉遂薦於南康張萬頃大夫爲經略判官挈家而往袁氏每

遇青松高山凝睇久之若有不快意到瑞州袁氏曰去此半程江端有決山寺我家舊有門徒僧惠幽居於此寺別來數十年僧行夏臘極高能別形骸善出塵垢儻經彼設食頗益南行之福恪曰然遂辦齋蔬之具及抵寺袁氏欣然易服理鬢攜二子詣老僧院若熟其逕者恪頗異之遂持碧玉環子而獻僧曰此是院中舊物僧亦不曉及齋罷有野猿數十連臂下於高松而食於臺上後悲嘯捫蘿而躍袁氏惻然俄命筆題僧壁曰剖破恩情役此心無端變化幾湮沉不如逐伴歸山去長嘯一聲煙霧深乃擲筆於地撫二子咽泣數聲語恪曰好住好住吾當永訣矣遂裂衣化爲老猿追嘯者躍樹而去將抵深山而復返視恪乃驚怛若魂飛神喪良久撫二子一慟乃詢於老僧僧方悟此猿是貧道爲沙彌時所養開元中有天使高力士經過此憐其慧黠以束帛而易之聞抵洛京獻於天子時有天使來往多說其慧黠過人常馴擾於上陽宮內聞安史之亂卽不知所之於戲不期今日更覩其怪異耳碧玉環者本訶陵胡人所施當時亦隨猿頸而往今方悟矣恪遂惆悵臙舟六七日攜二子而廻棹更不能之任矣

袁氏傳終

古今說海

少室仙姝傳

說淵十四 別傳十四

寶厯中有封陟孝廉者居於少室貌態潔朗性頗貞端志在典墳僻於林藪探義而星歸腐草閱經而月墜幽窗矻矻孜孜俾夜作晝無非搜索隱奧未嘗縱恣日時也書堂之畔景像可鏡泉石清寒桂蘭雅澹戲滌每竊其庭果啖鶴頻棲於澗松虛籟時吟凝埃晝闌煙鏤簷篔之翠節露滋躑躅之紅葩薜蔓衣牆苔茸毯砌時夜將午忽飄異香酷烈漸布於庭際俄有輜輶自空而降畫輪軋軋直湊簷楹覩一仙姝侍從華麗玉珮敲磬羅裙曳雲體欺皓雪之容光臉奪芙蕖之濯豔正容斂衽而揖陟曰某籍本上仙謫居下界或遊人間五岳或止海面三峰月到瑤階愁莫聽其鳳管蟲吟粉壁恨不寐於鴛衾燕浪語而徘徊鸞虛歌而縹緲寶瑟休泛虬觥巒掛紅杏豔枝激含嘖於綺殿碧桃芳藻引凝睇於瓊樓既厭曉妝漸融春思伏見郎君神儀溶潔襟量端明學聚流螢文含隱豹所以慕其貞朴愛以孤標特謁光容願持箕帚又不知郎君雅旨如何陟攝衣朗燭正色而坐言曰某家本貞廉性唯孤介貪古人

之糟粕究前聖之指歸編柳苦辛然糠幽暗布被糲食燒蒿茹藜但自困窮終不斯
濫必不敢當神仙降顧斷意如此幸早廻車姝曰某乍造門墻未申懇迫輒有詩一
章奉留復七日更來詩曰謫居蓬島別瑤池春媚煙花有所思爲愛君心能潔白願
操箕帚奉屏幃陟覽之若不聞雲軒旣去窗戶遺芳然陟心中不可轉也後七日夜
姝又至騎從如前時麗容潔服豔媚巧言又白陟曰某以業緣遽縈魔障歛起蓬山
瀛島繡帳錦宮恨起紅茵愁生翠被難窺舞蝶於芳草每妬流鶯於綺叢靡不雙飛
俱能對詩自矜孤寢轉憎空閨秋却銀缸但凝眸於片月春尋瓊圃空杼思於殘花
所以激切前時布露丹懇幸垂采納無阻精誠又不知郎君意竟如何陟又正色而
言曰某身居山藪志已顛蒙不識鉛華豈知女色幸垂速去無相見尤姝曰願不貲
其深疑幸望容其陋質輒更有詩一章後七日復來詩曰弄玉有夫皆得道劉剛兼
室盡登仙君能仔細窺朝露須逐雲車拜洞天陟覽之又不過意後七日夜姝又至
態柔容冶靚衣明眸又言曰逝波難駐西日易頽花木不停薤露非久輕瀉泛水只
得逡巡微燭當風莫過瞬息虛爭意氣能得幾時恃賴韶顏須臾槁木所以君誇容

鬢尙未凋零固止綺羅貪窮典籍及其衰老何以任持我有還丹頗能駐命許其依託必寫襟懷能遣君壽例三松瞳芳兩目仙山靈府任意追遊莫種槿花使朝晨而騁豔休敲石火尙昏黑而流光陟乃怒目而言曰我居書齋不欺暗室下惠爲證叔子爲師是何妖精苦相凌逼心如鐵石無更多言儻若遲廻必當窘辱侍衛諫曰小娘子廻車此木偶人不足與語况窮薄當爲下鬼豈神仙配偶耶姝長吁曰我所以懇者爲是青牛道士之苗裔况此時一失又須曠居六百年不是細事於戲此子大是忍人又留詩曰蕭郎不顧鳳樓人雲澁廻車淚臉新愁想蓬瀛歸去路難窺舊苑碧桃春輜轡出戶珠翠響空冷冷簫笙杳杳雲路然陟意不易後三年陟染疾而終爲太山所追束以巨鑕使者驅之欲至幽府忽遇神仙騎從清道甚嚴使者躬身於路左曰上元夫人遊太山耳俄有仙騎召使者與囚俱來陟至彼仰窺乃昔日求偶仙姝也但左右彈指悲嗟仙姝遂索追狀曰不能於此人無情遂索大筆判曰封陟性雖執迷操惟堅潔實由朴黷難責風情宜更延一紀左右令陟跪謝使者遂解去鐵鑕曰仙官已釋則幽府無敢追攝使者却引歸良久蘇息後追悔昔日之事慟哭

古今說海 說淵丙集 少室仙姝傳

自咎而已

少室仙姝傳終

古今說海

李林甫外傳

說淵十五 別傳十五

唐右丞相李公林甫年二十尙未讀書在東都好遊獵打毬馳逐鷹狗每於城下槐壇下驢擊鞠略無休日旣憊捨驢以兩手返據地歇一日有道士甚醜陋見李公踞地徐言曰此有何樂耶君如此愛也李怒顧曰關足下何事道者去明日又復言之李公幼聰悟意其異人乃攝衣起謝道士曰郎君雖善此然忽有顛墜之苦則悔不可及李公請自此修謹不復爲也道士嘯曰與郎君後三日五更會於此曰諾及往道士已先至曰爲約何後李乃謝之曰更三日復來李公夜半往良久道士至甚喜談笑極洽且曰某行世間五百年見郎君一人已列仙籍合白日升天如不欲則二十年宰相重權在己郎君且歸熟思之後三日五更復會於此李公回計之曰我是宗室少豪俠二十年宰相重權在己安可以白日升天易之乎已決矣及期往白道士嗟嘆咄叱如不自持曰五百年始見一人可惜可惜李公悔欲復之道士曰不可也神明知矣與之敍別曰二十年宰相生殺權在己威振天下然慎勿行陰賊當爲

陰德廣救拔人無枉殺人如此則三百年後白日上升矣官祿已至可便入京李公匍匐泣拜道士握手與別時李公堂叔爲庫部郎中在京遂詣叔父以其縱蕩不甚紀錄之頗驚曰汝何得至此曰某知向前之過今故候覲請改節讀書願受鞭箠庫部甚異之亦未令就學每有賓客遣監杯盤之飾無不修潔或謂曰汝爲吾著某事雖雪深沒踝亦不去也庫部益親憐之言於班行知者甚衆自後以廕敘累官至贊善大夫不十年遂爲相矣權巧深密能伺上旨恩顧隆洽獨當衡軸人情所畏非臣下矣數年後自固益切乃起大獄誅殺異已冤死相繼都忘道士槐壇之言戒也時李公之門將有趨謁者必望之而步不敢乘馬忽一日方午有人扣門吏驚候之見一道士甚枯瘦曰願報相公闈者呵而逐之外吏又欲鞭縛送於府道士微嘯而去明日日中復至門者乘間而白李公曰吾不認識汝試爲通及道士入李公見之醒然而悟乃槐壇所覩也慙悸之極若無所措卻思二十年之事今已至矣所承教戒曾不慙行中心如疾乃拜道士迎嘯曰相公安否當時之請並不見從遣相公行陰德專枉殺人上天甚明謹謫可畏如何李公但搯額而已道士留宿李公盡除僕使

處於中堂各居一榻道士唯少食茶果餘無所進至夜深李公曰昔奉教言尙有昇天之契今復遂否道士曰緣相公所行不合其道有所竄責又三百年也更六百年乃如約矣李公曰某人間之數將滿既有罪譴後當如何道士曰莫要知否亦可一行李公降榻拜謝曰相公安神靜慮萬想俱遣幾如枯株即可俱也良久李公曰某都無念慮矣乃下招曰可同往李公不覺便隨道士去出大門及春明門到輒自開李公援道士衣而過漸行十數里李公素貴尤不善行困苦頗甚道士亦自知之曰莫思歇否乃相與坐於路隅逡巡以數節竹授李公曰可乘此至地方止慎不得開眼李公遂跨之騰空而上覺身泛大海但聞風水之聲食頃止見大郭邑介士數百羅列城門道士至皆迎拜兼拜李公約一里到一府署又入門復有甲士升階至大殿帳榻華侈李公困欲就帳臥道士驚牽起曰未可恐不可廻耳此是相公身後之所處也曰審如是某亦不恨道士嘯曰茲介鱗之屬其間苦事亦不少遂卻與李公出大門復以竹杖授之一如來時之狀入其宅登堂見身冥坐於床上道士乃呼曰相公相公李公遂覺涕泗交流稽首陳謝明日別去李公厚以金帛贈之俱無所受

但揮手而已曰勉旃六百年後方復見相公遂出門而逝不知所在先是安祿山常養道術士每語之曰我對天子亦不恐懼唯見李相公若無地自容何也術士曰公有陰兵五百皆有銅頭鐵額常在左右何以如此某安得見之祿山乃奏請宰相宴於已宅密遣術士於簾間窺伺退曰奇也某初見報相公有一青衣童子捧香爐而入僕射侍衛銅頭鐵額之類皆穿屋踰墻奔走去某亦不知其故也當是仙官暫謫在人間耳

李林甫外傳終

古今說海

遼陽海神傳

說淵十六 別傳十六

程宰士賢者徽人也正德初元與兄某挾重賞商於遼陽數年所向失利展轉耗盡徽俗商者率數歲一歸其妻孥宗黨全視所獲多少爲賢不肖而愛憎焉程兄弟既皆落莫羞慚慘沮鄉井無望遂受傭他商爲之掌計以糊口二人聯屋而居抑鬱憤懣殆不聊生至戊寅秋又數年矣遼陽天氣早寒一夕風雨暴作程已擁衾就枕苦寒思家攬衣起坐悲歌浩歎恨不速死時燈燭已滅又無月光忽盡室明朗殆同白晝室中什物毫髮可數方疑惑間又覺異香氣氤氳莫知所自風雨息聲寒威頓失程益錯愕不知所爲亟啓戶出視則風雨晦寒如故閉戶入室卽別一境界矣疑鬼物所幻高聲呼怪冀兄聞之兄寢室纔隔一土壁連呼數十寂然不應愈惶急無計遂引衾冪首向壁而臥少頃又聞空中車馬喧鬧管絃金石之音自東南來初猶甚遠須臾已入室矣回眸竊視則三美人皆朱顏綠鬢明眸皓齒約年二十許冠幘盛飾若世所圖畫后妃之狀遍體上下金翠珠玉光艷互發莫可測識容色風度奪目驚

心眞天人也前後左右侍女數百亦皆韶麗或提爐或揮扇或張蓋或帶劍或持節或捧噐幣或秉花燭或挾圖書或列寶玩或荷旌幢或擁衾褥或執巾幌或奉盤匱或擎如意或舉殺核或陳屏障或布几筵或奏音樂雖紛紜雜沓而行列整齊不少錯亂室纔方丈數百人各執其事周旋進退綽然有餘不見其隘門窗皆扁不知何自而入俄頃冠幘者一人前逼床撫程微笑曰果熟寢耶吾非禍人者子有夙緣故來相就何見疑若是且吾已至此必無去理子便高呼終夕兄必不聞徒自苦耳速起速起程私計此物靈變若斯非仙則鬼果欲禍我雖臥不起其可道乎且彼既有夙緣語亦或無害遂推枕下榻匍匐前拜曰下界愚夫不知眞仙降臨有失虔迓誠合萬死伏乞哀憐美人引手掖程起慰令無懼遂與南面同坐其二入者東西相向皆言今夕之會數非偶爾慎勿自生疑阻遂命侍女行酒進饌品物皆生平目所未觀纔一舉筋珍美異常心胸頓爽俄以紅玉蓮花卮進酒卮亦絕大約容酒升許程素少飲固辭不勝美人笑曰郎懼醉耶此非入間麴蘖所醞奈何槩以狂藥見疑遂自舉卮奉程程不得已爲之一吸酒凝厚如錫而爽滑異甚略不黏齒其甘香清冽

醴泉甘露弗及也不覺一卮俱盡美人又笑曰郎已信吾未遂連酌數卮精神愈開略無醉意酒每一行必入音齊奏聲調清和令人有超凡遺世之想酒闌東西二美人起曰夜已向深郎夫婦可就寢矣遂爲褰帷拂枕而去其餘侍女亦皆隨散凡百器物瞥然不見門亦尙扃又不知何自而出獨留同坐美人相與解衣登榻則帷褥衾枕皆極珍奇非向之故物矣程雖駭異殊亦心動美人徐解髮縮髻黑光可鑑殆長丈餘肌膚滑瑩凝脂不若側身就程豐若有餘柔若無骨程於斯時神魂飄越莫知所爲矣已而交會纔合丹流浹藉若喜若驚若遠若近嬌怯宛轉殆弗能勝真處子也程既喜出望外美人亦眷程殊厚因謂世間花月之妖飛走之怪往往害人以見惡吾非若比耶慎勿疑雖不能有大益於郎亦可致郎身體康勝資用稍足儻有患難亦可周旋但不宜漏泄耳自今而後遂當恒奉枕席不敢有廢兄雖至親亦慎勿言言則大禍踵至吾亦不能爲子謀矣程聞言甚喜合掌自誓云某本凡賤猥蒙眞仙厚德恨碎骨粉身不能爲報伏承法旨敢不銘心儻違初言九殞無悔誓畢美人挾程項謂曰吾非仙也實海神也與子有夙緣甚久故相就耳須臾鄰舍雞鳴

至再美人攬衣起曰吾今去矣夜當復來郎宜自愛言畢昨夕二美人及諸侍女齊到各致賀詞盥洗嚴妝捧擁而出美人執程手囑令勿泄丁寧數四去復回顧不忍暫舍愛厚之意不可言狀程益傾喜發狂不能自禁轉盼間已失所在諦觀門扉猶昨夕所扃也回視室中則土炕布衾荆筐蘆席依然如舊向之瑰異無有矣程茫然自失曰豈其夢耶然念飲食笑語交合誓盟之類皆歷歷明甚非夢境也且惑且喜頃之曙色辨物出就兄室兄大駭曰汝今晨神彩發越頓異昨日何也程恐見疑謬言年來失志鄉井無期昨夕暴寒愁思殊切展轉悲歎竟夕不寢兄必聞之有何快心而神彩發越耶兄言我亦苦寒思家不寢靜聽汝室始終聞然何嘗聞有悲歎聲耶已而商夥羣至見程容色皆大駭異言與兄合程但唯唯謙晦而已然程亦自覺神思精明肌體膩潤倍加於前心竊喜之惟恐其不復至也是日頻視晷影恨不速移纔至日晡託言腹痛入室扃扉虔想以伺及街鼓初動則室中忽然復明宛如昨夕俄頃雙爐前導美人至矣侍女數人耳儀從不復疇昔之盛彼二人者亦不復來美人笑曰郎果有心若是但當終始於一耳卽命侍女行酒薦饌珍腆如昨歡謔諧

笑則有加焉須臾徹席就寢侍女復散顧視床褥又錦繡重疊矣然不見其鋪設也程私念吾且詐跌床下試其所爲方欲轉身則室中全襯錦裯地無寸隙矣是夕綯繆好合愈加親狎晨鷄再鳴復起妝沐而去自後人定卽來鷄鳴卽起率以爲常殆無虛夕雖言語喧鬧音樂迭奏兄室甚邇終不聞知莫知其何術也程每心有所慕卽舉目便是極其神速一夕偶思鮮荔枝卽有帶葉百餘顆香味色皆絕珍美他夕又念楊梅卽有白色一枝長三四尺約二百餘顆甘美異常葉殊鮮嫩食餘忽不見時已深冬不知何自而得况二物皆非北地所產也又夕言及鸚鵡程言聞有白者恨未之見轉盼間已見數鸚鵡飛舞於前白者五色者相半或誦佛經或歌詩賦皆漢音也一日市有大賈售寶石二顆所謂硬紅者色若桃花大於拇指價索百金程偶見之是夜言及美人撫掌曰夏蟲不可語冰信哉言絕卽異寶滿室珊瑚有高丈許者明珠有如鵝卵者五色寶石有如栲栳者光艷燦目不可正視轉睫間又忽空室矣是後相狎卽久言及往年貿易耗折事不覺嗟歎美人又撫掌曰方爾歡適便以俗事嬰心何不洒脫若是耶雖然郎本業也亦無足異言絕卽金銀滿前從地及

棟莫知其數指謂程曰子欲是乎程歆艷之極欲有所取美人引筯挾食前肉一瓣擲程面問曰此肉可黏君面否程言此是他肉何可黏吾面也美人笑指金銀此是他物何可爲君有耶君欲取之亦無不可但非分之物不足爲福適取禍耳吾安忍禍君也君欲此物可自經營吾當相助耳時已卯初夏有販藥材者諸藥已盡獨餘黃蘗大黃各千餘斤不售殆欲委之而去美人謂程是可居也不久大售矣程有傭直銀十餘兩遂盡易而歸其兄謂弟失心病風諄罵不已數日疫癘盛作二藥他肆盡缺卽時踴貴果得五百餘金又有荆商販綵段者途間遭濕熱蒸發班過半日夕涕泣美人謂程是亦可居也遂以五百金獲四百餘疋兄又頓足不已謂弟福薄得此非分之財隨亦喪去爲之悲泣商夥中無不相咎竊笑者月餘逆藩宸濠反於江西朝廷急調遼兵南討師期促甚戎裝衣幟限在朝夕帛價騰踴程所居者遂三倍而售庚辰秋有蘇人販布三萬餘者已售什八矣尙存釐者什二忽聞母死急欲奔喪美人又謂程是亦可居也程往商價蘇人獲利已厚歸計又急止取原直而去蓋以千金易六千餘匹云明年辛巳三月武宗崩天下服喪遼旣絕遠布非土產價遂

頓高又獲利三倍如是屢屢不能悉紀四五年間展轉數萬殆過昔年所喪十倍矣
宸濠之變也人心危駭流言屢至或謂據南都卽位矣或謂兵渡淮矣或謂過臨清
近德州矣一日數端莫知誠僞程心念鄉邑殊不能安私叩美人美人哂曰真天子
自在湖湘間彼何爲者止作死耳行且就擒矣何以慮爲時七月下旬也月餘報至
逆徒果以是月二十六日兵敗程初聞真天子在湖湘之說恐江南復遭他變愈疑
懼美人搖首曰無事無事國家慶祚靈長天下方享太平之福近在一二年耳更叩
其詳曰期已近矣何必豫知再期今上中興海宇於變悉如美人之言其明驗之大
者如此餘細弗錄他夕程問天堂地獄因果報應之說有諸曰作善降之百祥作不
善降之百殃心所感召各以類應物理自然若謂冥冥之中必有主者銖銖兩兩而
較其重輕以行誅賞爲神祇者不亦勞乎輪迴之說有諸曰釋以爲有誣也儒以爲
無亦誣也人有真元完固者形骸雖斃而靈性猶存投胎奪舍間亦有之千億中之
一二也人死而爲厲有諸曰精神未散無所依歸往往憑物爲厲所謂游魂爲變耳
人間祭祀鬼神歆饗有諸曰精誠所至一氣感通自然來格非鬼而祭徒自譎耳所

謂神不歆非類民不祀非族也人有化爲異類者何也曰人之心術旣與禽獸無異積之至久外貌猶人而五內先化一旦改形無足深訝異類亦有化人者何也曰是與人化異類同一理耳人有爲神仙者何也曰異類猶有化人者况人與仙本一階耳又何足異雷神巧異往往有迹何也曰陽能變化理所自然人得幾何而智巧若是况雷實至陽其爲神變何足怪乎龍能變化大小不常何也曰龍亦至陽故能屈伸變化無足問也蜃氣能爲山川城郭樓臺人物之形何也曰天地精明之氣游變無常兩間所有時或示現此可驗天地生物之機所謂在天成象在地成形也蜃何能爲程平生所疑皆爲剖析詞旨明婉如指諸掌又夕問美人姓氏爲何曰吾旣海神有何姓氏多則天下人皆吾同姓否則一姓亦無也有父母親戚乎曰旣無姓氏豈有親戚多則天下人盡吾同胞少則全無瓜葛也年幾何矣曰旣無所生有何年歲多則千歲不止少則一歲全無言多此類迨嘉靖甲申首尾七年每夜必至氣候悉如江南二三月琪花寶樹仙音法曲變幻無常耳目應接不暇有時或自吹簫鼓琴浩歌擊筑必高徹雲表非復人世之音蓋凡可以娛程者無不至也兩情纏綿愈

久愈固一夕程忽念及鄉井謂美人曰僕離家二十年矣向因耗折不敢言旋今蒙大造豐饒過望欲暫與兄歸省墳墓一見妻子便當復來永奉歡好期在周歲幸可否之美人歔歔嘆曰數年之好果盡此乎耶宜自愛勉圖後福言訖悲不自勝程大駭曰某告假歸省必常速來以圖後會何敢有負恩私而夫人乃遽棄捐若是耶美人泣曰大數當然非關彼此耶適所言自是數當永訣耳言猶未已前者同來二美人及諸侍女僕從一時皆集簫韶迭奏會燕如初美人自起酌酒勸程追叙往昔每吐一言必汎瀾哽咽程亦爲之長慟自悔失言兩情依依至於子夜諸女前啓大數已終法駕備矣速請登途無庸自戚美人猶執程手泣曰子有三大難近矣時宜警省至期吾自相援過此以後終身清吉永無悔吝壽至九九當候子於蓬萊三島以續前盟子亦自宜宅心清淨力行善事以副吾望身雖與子相遠子之動作吾必知之萬一墮落自干天律吾亦無如之何也後會迢遙勉之勉之丁寧頻復至於十數程斯時神志俱喪一辭莫措但雪涕耳既而鄰鷄羣唱促行愈急乃執手泣訣而去猶復回盼再四方忽寂然於時蟋蟀悲鳴孤燈半滅頃刻之間恍如隔世亟啓戶出

觀但曙星東升銀河西轉悲風蕭颯鐵馬叮嚀而已情發於中不覺哀慟纔號一聲兄卽驚呼問故蓋不復昔之若輩矣兄旣細詰不已度弗能隱乃具述會合始末及所以豐裕之由兄始駭悟相與南望瞻拜至明而城之內外傳皆遍矣程由是終日鬱鬱若居伉儷之喪遂束裝南歸伴兄先部貨賄自潞河入舟而自以輕騎由京師出居庸至大同省其從父流連累日未發忽夕夢美人催去甚急曰禍將至矣猶盤桓耶程憶前言卽晨告別而從父殷勤留餞抵暮出城時已曠黑乃寓宿旅館是夜三鼓又夢美人連催速發云大難將至稍遲不得脫矣程驚起策騎東奔四五里忽聞砲聲連發回望城外則火炬四出照天如晝矣蓋叛軍殺都御史張文錦脅城內外壯丁同逆也及抵居庸夜宿關外又夢美人連促過關云稍遲必有狴犴憂矣程又驚起叩關候門啓先入行數里而宣府檄至凡自大同入關者非公差吏人皆桎梏下獄詰驗恐有姦細入京也是夜與程偕宿者無一得免有禁至半年者有瘦死於獄者程入舟爲兄備言得脫之故感念不已及過高郵湖天雲驟黑狂風怒號舟掀蕩如簸須臾二桅皆折舵零落如粉傾在瞬息矣忽聞異香滿舟風卽頓息俄而

黑霧四散中有彩雲一片正當舟上則美人在焉自腰以上毫髮分明以下則霞光擁蔽莫可辨也程悲感之極涕泗交下遙瞻稽首美人亦於雲端舉手答禮容色猶戀戀如故也舟人皆不之見良久而隱從是遂絕矣戊子初夏余在京師聞其事猶疑信間適某僉憲某總戎自遼入京言之詳甚然猶未聞大同以後事今年丙申在南院客有言程來遊雨花臺者遂令邀與偕至詢其始末程故儒家子少嘗讀書其言歷歷具有源委且年已六袞容色僅如四十許人足徵其遇異人無疑而昔聞不謬也作遼陽海神傳

林屋山人蔡羽述

遼陽海神傳終

宣統元年七月出版

不許複製

藏版者

集成圖書公司

印刷所

北京崇文門內船板胡同
集成圖書公司
電話總局五百八十五號

總發行所

上海棋盤街
集成圖書公司

分發行所

北京 天津 漢口 廣東 山西
集成圖書公司

經售處

各埠大書坊

古今說海全部計十二冊
定價大洋四元正

024414

上海图书馆藏书



A541 212 0017 0125B

